




TVET LEVEL II



BASIC EDUCATION

Kinyarwanda

TRAINEE MANUAL



Approved by:  Workforce
Development
Authority



USAID
FROM THE AMERICAN PEOPLE



Gushimira

Rwanda Polytechnic irashimira abafashije bose mw'itegurwa n'imyandikire y'iyi mfashanyigisho y'ikinyarwanda. Turashimira cyane ikigo gishinzwe guteza imbere imyuga n'ubuminyigiro, EDC binyuze mu mushinga wa USAID Huguka Dukore Akazi Kanoze (USAID - HDAK), Akazi Kanoze Access (AKA), Amashuri y'imyuga muri rusange, abikorera kugiti cyabo, Umushinga wa GIZ Hanga Ahazaza ndetse n'abandi bantu bose bagize uruhare mw'itegurwa ry'iyi mfashanyigisho.



Byagenzuwe na Rwanda Polytechnic (RP)



Hagendewe ku mabwiriza n'ibipimo bitangwa na Workforce Development Authority (WDA)



Ku nkunga yatanzwe n'umushinga wa USAID through Huguka Dukore Akazi Kanoze (HDAK Project)



Inkunga ya tekniike yatanzwe na Education Development Center binyuze mu nzobere za USAID HDAK b'imbere mu gihugu nabo hanze y'I gihugu

Itsinda ry'Abateguye izi mfashanyigisho

Abanditsi n'abagenzuye

Bwana Jean Marie Vianney Murera

Bwana Shami Aloys Rukizangabo

Gutegura no Kugenzura Imyandikire

Bwana Jean Bosco Matata

Bwana Jean Marie Vianney Muhire

Bwana Didier Bigirumwami

Gushushanya ndetse no gutunganya imfashanyigisho

Bwana Albert Ngarambe

Bwana Simon Pierre Abayiringira

Inkunga ya tekinike y'imitegurire y'iyi mfashanyigisho

Umushinga wa USAID Huguka Dukore Akazi Kanoze (HDAK)

Ushyirwa mu bikorwa na Education Development Center
(EDC)

Igitabo cy'umutozwa: IKORESHA RY'IKINYARWANDA GIKWIYE MU KAZI



Imbumbe ya 1:

Ishyikirana n'abandi mu mvugo

Ibyigwa

- 1.1. Imikoreshereze ikwiriye y'imvugo yabugenewe y'ikinyabupfura igihe avugana n'abandi
- 1.2. Isubiza ry'ibibazo neza akoresheje imvugo iboneye yubahiriza amategeko y'ikibonezamvugo
- 1.3. Ukuganira mu buryo buboneye agaragaza ibitekerezo bye ashingiye ku nsanganyamatsiko yatoranyijwe
- 1.4. Ihangana n'Imurika ry'ibihangano bye mu buryo bunozze akoresheje imvugo iboneye, interuro zuzuye, yubahiriza amabwiriza y'isanisha, utwatuzo n'isesekaza

Inshamake y'imbumbe ya 1:

Muri iyi mbumbe ya mbere dusangamo uburyo bwo gukoresha imvugo yabugenewe y'ikinyabupfura, wirinda imvugo nyandagazi mu gihe uvugana n'abandi mu mirimo yawe ya buri muni, ugakoresha imvugo yubahiriza imikoreshereze y'amoko anyuranye y'amagambo ukurikije umumaro wayo mu interuro. Dusangamo n'ibiranga urwenya n'uko umuntu yarukoresha asabana n'abandi.

Turabonamo nanone uburyo bwo gusubiza ibibazo ukoresheje imvugo iboneye yubahiriza amategeko y'ikibonezamvugo ku myandiko ijyanye n'insanganyamatsiko yo kurengera ibidukikije, uburinganire n'ubwuzuzanye no gukunda umurimo no kuwunozza. Twabonye ibyiciro bitanu by'inyunguramagambo ari byo: impuzanyito, imbusane, imvugwakimwe ingwizanyito n'impuzashusho. Dusangamo uko bahina umwandiko tubonamo n'itandukaniro hagati y'interuro mbonezamvugo na nyobyamvugo.

Muri iyi mbumbe kandi tubonamo uko umuntu aganira n'abandi agaragaza ibitekerezo bye ashingiye ku nsanganyamatsiko runaka binyuze mu kiganiro nyunguranabitekerezo cyangwa ikiganiro mpaka.

Twungutse ndetse n'uburyo umuntu amurika ibihangano bye akoresheje imvugo iboneye, interuro zuzuye, yubahiriza amabwiriza y'isanisha, utwatuzo n'isesekaza. Ibi bikagaragarira mu ndirimbo n'umuvugo kandi byose bigakorwa hubahirizwa amoko y'interuro z'ikinyarwanda.



Gusuzuma ubushobozi umutozwa afite ku nyigisho igiye kwigwa mu mbumbe ya 1

1. Itegereze ishusho. Urabonaho iki? Ibyo ubonaho urabona biganisha ku ki? Utekereza ko muri iyi mbumbe twigamo iki?
2. Uzuza imbonerahamwe ikurikira.

Nta buryo buri bwo cyangwa ubutari bwo bwo gusubiza iki kibazo; ahubwo ni ibigufasha wowe ubwawe muri iyi nyigisho. Tekereza wowe ubwawe. Niba ibi ushoboye kubikora n'ikigero ubishoboyeho. Soma ibibanza mu kazu ko hejuru hanyuma ushyire akamenyetso aho ubona hajyanye n'ikigero cy'uko ubyumva.

Inararibonye ryange	Nta kintu na kimwe nzi ku mikoreshere ze yabyo.	Nziho bike.	Nziho ibiringaniye.	Nziho byinshi.	Ndiyizeye ku mikoreshere ze yabyo.
Ubumenyi, ubumenyi ngiro n'ubukeshya					
Kuvuga amoko y'imvugo					

Kurondora amoko n'imimaro by'amagambo biboneka mu nteruro					
Kugaragaza ibiranga urwenya					
Gutandukanya amoko y'imvugo					
Kugaragaza amoko n'imimaro by'amagambo mu nteruro					
Gutera urwenya					
Kuvuga ibyitabwaho mu gusoma no gusesengura imyandiko					
Kurondora ibyiciro by'inyunguramagambo: impuzanyito, imbusane, imvugwakimwe, ingwizanyito n'impuzashusho					
Gutanga inshoza y'ihinamwandiko					
Kuvuga icyo interuro mbonezamvugo n'interuro nyobyamvugo ari cyo					
Gusoma no gusesengura imyandiko					
Gutandukanya ibyiciro by'inyunguramagambo: impuzanyito, imbusane, imvugwakimwe, ingwizanyito n'impuzashusho no kubikoresha mu nteruro					
Gukora ihinamwandiko					
Gutandukanya interuro mbonezamvugo n'interuro nyobyamvugo					
Kuvuga inshoza, uturango n'imitegurire by'ikiganironyunguranabiteker ezo					
Kuvuga inshoza y'ikiganiro mpaka no kugaragaza imbata yacyo					

Gutegura no gutanga ikiganiro nyunguranabitekerezo					
Gutegura no kuyobora ikiganiro mpaka					
Kuvuga inshoza n'uturango by'indirimbo					
Kuvuga inshoza n'uturango by'umuvugo					
Kuvuga amoko y'interuro n'ingiro zikoreshwamo					
Kuvuga amategeko y'isanisha n'utwatuzo tw'ibanze					
Guhanga no kuririmba indirimbo					
Guhanga no kuvugira umuvugo imbere y'abandi					
Gukoresha neza amoko y'interuro n'ingiro					
Kubahiriza isanisha n'utwatuzo tw'ibanze					

Ikigwa cya 1.1: Imikoreshereze ikwiriye y'imvugo yabugenewe y'ikinyabupfura igihe avugana n'abandi



Ubushobozi fatizo: Gukoresha uko bikwiriye imvugo yabugenewe y'ikinyabupfura igihe avugana n'abandi

Ubumenyi	Ubumenyi ngiro	Ubukeshya
1. Kuvuga amoko y'imvugo	1. Gutandukanya amoko y'imvugo	1. Kujora imvugo nyandagazi no guharanira kuyikosora
2. Kurondora amoko n'imimaro by'amagambo biboneka mu nteruro	2. Kugaragaza amoko n'imimaro by'amagambo mu nteruro	2. Kurangwa n'imvugo yubahiriza imikoreshereze inoze y'amagambo mu nteruro
3. Kugaragaza ibiranga urwenya	3. Gutera urwenya	3. Kwihatira gutera urwenya no gutebya bishimangira indangagaciro z'umuco nyarwanda

Intangiriro: Ni ibiki nzi kuri iyi nyigisho, hanyuma ni ibihe nkeneye kumenya?



Ikigwa cya 1.1 Umwitozo 1

Somera hamwe na mugenzi wawe mwegeranye umwandiko ukurikira maze musubize ibibazo byawubajijweho.

Umva rero mwa maniga mwe, ubu nk’uko namwe mubiyoka, ibihe tugezemo ntibikiri sawa. Aho abatipe n’abatipete bitekerereje gutarasa usanga abaviye batangira kubaraburiza. Umwuga wose umuntu yari atekereje kubonamo akaryo usanga bihita bimuraburana. Nge rero buriya navuga nti: “Ngiye gukora uko nshoboye negere abajyanama mu by’uburezi mbabaze uko umuntu yakwitoza neza umwuga wazamuha rinye ikosotse”.

1. Imvugo yakoreshejwe iri mu buhe bwoko bw’imvugo?
2. Bene iyi mvugo irangwa n’iki?
3. Ni ayahe magambo ataboneye yakoreshejwe?
4. Ni ayahe magabo wayasimbuza kugira ngo iyi mvugo ibe imvugo itunganye?

Amagambo y’imvugo itaboneye	Amagambo y’imvugo iboneye
Mwa maniga mwe	
Mubiyoka	
Ntibikiri sawa	
Abatipe n’abatipete,	
Gutarasa	
Abaviye	
Kubaraburiza	
Akaryo	
Bimuraburana	
Rinye ikosotse.	



Igikorwa cyo gutahura ibisubizo by’ikibazo



Ikigwa cya 1.1 Umwitozo 2

Soma inkuru ikurikira usubize ibibazo byayibajijweho.

Mahirwe mu nama

Igitondo kimwe Mahirwe, umujyanama mu by’ubuhinzi, yagiye kuyobora inama yari iteganyirijwe abahinzi bo mu gace yari ashinzwe, ageze asanga hageze abahinzi bake cyane abandi batarahagera. Byabaye ngombwa ko abategereza umwanya munini.

Bakomeje gutinda, Mahirwe yatangiye kwiciraguraho no kuvuga nabi. Kera kabaye baraza. Atangira inama agira ati: “Yemwe mwa biturage mwe bikererwa mwari muyobewe ko inama igomba gutangirira igihe? Ntimuzi ko muri iki gihe tugomba gukora nk’abajene tukarangwa n’ibintu biri simati?” Arangije kuvuga ayo magambo abahinzi bamwe bakomeza kongorerana buhoro banenga iyo myitwarire y’ubakoresha inama. Na we ati: “Ngaho rero nimwikarume dukomeze inama.” Yakomeje abagezaho ibyo yari yabateguriye. Inama yagombaga gusozwa n’umwanya w’ibibazo cyangwa no kungurana ibitekerezo.

Umugore umwe atanga igitekerezo ariko anakosorera iyo myitwarire yo kuvuga nabi mu buryo bw’urwenya. Ati: “Abantu twese tuge twibuka kubahiriza inshingano twiyemeje, dore ko bamwe baba baranabirahiriye mbere yo gutangira akazi kabo”. Yungamo ati: “Umuntu wari ushinze umutekano yateshutse gato mu mvugo abonye umusaza wari utambutse bazamura ibendera agakomeza akagenda mu gihe abantu basabwaga guhagarara icyo gikorwa kikarangira, aramubwira ati: ‘Wa gisaza we kuki ugenda utaramukije ibendera?’ Umusaza asubira inyuma abwira wa muntu ati: ‘Yoo! Mwana wa, ibyo na byo tubipfe koko?’ Yegera ibendera ati: ‘Waramutse bendera?’ Nuko umusaza arikomereza, wa muntu na we asigara yumiye yibaza ibimubayeho.” Abari aho bose baraseka barumirwa bataha biyemeje gukangukira kubahiriza inshingano zabo no gukoresha imvugo iboneye igihe bashyikirana n’abandi.

Ibibazo:

1. Garagaza imvugo nyandagazi yakoreshejwe muri iyi nkuru n’uko yakosorwa ikaba imvugo iboneye.

Imvugo nyandagazi	Imvugo iboneye
.....	
.....	
.....	
.....	

2. Mu magambo aciyeho akarongo ni ayahe ari mu moko y'amagambo akurikira?

Izina, ntera, ikinyazina, inshinga, icyungo, ingera (umugereka), indangahantu, irangamutima, ikegeranshinga

Izina	Ntera	Ikinyazina	Inshinga	Icyungo	Ingera(umugereka)	ikegeranshinga	indangahantu	irangamutima
.....								

3. Mu magambo aciyeho akarongo ni ayahe afite imimaro ikurikira?

Ruhamwa, izingiro ry'interuro, icyuzuzo, impuza n'imfutuzi.

Ruhamwa	Izingiro ry'interuro	Icyuzuzo	Impuza	Imfutuzi
.....				

4. Urwenya rurangwa n'iki?

Urwenya rurangwa no

1.1 Ingingo z'ingenzi zo kwitabwaho

- Imvugo iboneye irangwa no gukoresha amagambo atunganye, asanzwe mu rurimi (cyangwa ari amatirano ku buryo bwemewe), atari inzaduka.
- Imvugo nyandagazi irangwa no kutagaragaramo ikinyabupfura, gukoresha amagambo adatunganye mu rurimi, amagambo y'inzaduka, hakabamo kuvangavanga indimi mu buryo budakwiye. Ikoreshwa akenshi n'abisanzuranyeho ariko n'ubundi bikorwa mu buryo butemewe. Si imvugo rero yo gushyigikira.
- Mu nteruro habamo amoko anyuranye y'amagambo. Urugero: Izina, ntera, ikinyazina, inshinga, icyungo, ingera (umugereka), indangahantu, irangamutima, ikegeranshinga n'ayandi.
- Imimaro y'ibanze y'amagambo mu nteruro ni: ruhamwa, izingiro ry'interuro, icyuzuzo, impuza n'imfutuzi.
- Urwenya rurangwa no kubara inkuru mpimbano cyangwa amagambo n'imyifatire by'umuntu bisetsa abandi bikabaruhura cyangwa bikagira uwo bikosora.



Igikorwa cy' umwitozo wunganiwe



Ikigwa cya 1.1 Umwitozo 3

Ongera usome inkuru “**Mahirwe mu nama**” maze usubize ibibazo bikurikira wubahiriza amabwiriza yatanze kuri buri kibazo.

1. Mu matsinda ya babiribabiri nimuvuge ubwoko bw'amagambo aciyeho akarongo mu nteruro zikurikira:

Urugero:

Yagiye kuyobora inama yari iteganyirijwe abahinzi bo mu gace yari ashinzwe.

Yagiye: inshinga itondaguye mu mpitagihe.

- a. Agezeyo asanga hageze abahinzi bake cyane abandi batarahagera.
- b. Byabaye ngombwa ko abategereza umwanya munini.
- c. Mahirwe yatangiye kwiciraguraho no kuvuga nabi.
- d. Yemwe mwa biturage mwe bikererwa mwari muyobewe ko inama igomba gutangirira igihe?
- e. Ntimuzi ko muri iki gihe tugomba gukora nk'abajene tukarangwa n'ibintu biri simati?
 - i. **Agezeyo**:
 - ii. **Umwanya**:
 - iii. **Nabi**:

- iv. **Mwa:**
- v. **Muri:**

2. Mukorere mu matsinda y'abantu batanu maze mugaragaze imimaro y'amagambo aciyeho akarongo muri iki gika:

Umugore umwe atanga igitekerezo ariko anakosoreramo iyo myitwarire yo kuvuga nabi mu buryo bw'urwenya. Ati: "Abantu twese tuge twibuka kubahiriza inshingano twiyemeje, dore ko bamwe baba baranabirahiriye mbere yo gutangira akazi kabo".

Urugero:

Abantu twese tuge twibuka kubahiriza inshingano twiyemeje.

Twese: imfutuzi

Umugore:

Igitekerezo:

Ariko:

Nabi:

3. Nimukore amatsinda mwubahiriza ihame ry'uburinganire maze muge impaka zubaka ku nsanganyamatsiko ikurikira: "**Mu myuga inyuranye dukora, abatugana mu gihe bitwaye nabi tugomba kubacyaha tubabwira nabi**".

Muri buri tsinda ibitekerezo bivuguruzanya muraba mwatanze mubihurize hamwe maze mufate umwanzuro.

1.2 Ingingo z'ingenzi zo kwitabwaho

Iyo abantu bajya impaka ku ngingo runaka, bamwe batanga ibitekerezo bishyigikira ibikubiye mu nsanganyamatsiko, abandi bagatanga ibitekerezo bibivuguruza, ariko bakaba bagomba kugira icyo bemeranyaho mu gufata umwanzuro.



Igikorwa cy'umukoro ngiro



Ikigwa cya 1.1 Umwitozo 4

Ugendeye ku nkuru "**Mahirwe mu nama**" twasomye, subiza ibibazo bikurikira wubahiriza amabwiriza yatanze kuri buri kibazo.

1. Mu gika gikurikira, erekana amagambo afite umumaro wa **ruhamwa**, uw'izingiro ry'interuro, uw'icyuzuzo, uw'impuza n'uw'imfutuzi: "Nuko umusaza arikomereza, wa muntu na we asigara yumiwe yibaza ibimubayeho. Abantu bari aho bose baraseka barumirwa bataha biyemeje kubahiriza inshingano zabo no gukoresha imvugo iboneye igihe bashyikirana n'abandi".

Amagambo afite umumaro wa:

Ruhamwa:

Izingiro ry'interuro:

Icyuzuzo:

Impuza:

Imfutuzi:

2. Himba inkuru y'umuntu wakiriye neza abamugana akabakirana urugwiro bamusanze mu mwuga nk'uyu wawe, maze uyibwire bagenzi bawe kandi wirinda gukoresha imvugo nyandagazi.
.....
3. Tekereza urwenya waba uzi cyangwa uhimbe urwawe rushimangira indangagaciro z'umuco nyarwanda urwandike hanyuma urubwire bagenzi bawe.
.....
4. Hanga umwandiko w'imirongo nk'itanu cyangwa irengaho gato, ugaragazemo amagambo amwe n'amwe y'imvugo nyandagazi. Ayo magambo ugende uyacaho akarongo maze werekane n'uko wayakosora kugira ngo ukore imvugo iboneye.
.....



Iby'ingenzi ngomba kwibuka:

- Mu kazi umuntu agomba kwirinda imvugo nyandagazi, ahubwo akihatira gukoresha imvugo iboneye.
- Igihe tuvuga tugomba gukoresha neza amoko anyuranye y'amagambo mu nteruro hitawe ku mimaro yayo mu nteruro.
- Urwenya rurangwa no kubara inkuru mpimbano cyangwa amagambo n'imyifatire by'umuntu bisetsa abandi bikabaruhura cyangwa bikagira uwo bikosora.
- Iyo abantu bajya impaka ku ngingo runaka, bagomba kugira icyo bemeranyaho mu gufata umwanzuro.



Isuzuma rinoza imyigire n'imyigishirize

Uyu mwanya wagenewe ibibazo byo gusuzuma uko wumvise inyigisho irangiye.

Soma uyu mwandiko usubize ibibazo byawubajijweho. Ibyo bibazo ku mwandiko hamwe n'ibindi byiyongeraho uzabigetzaho n'umutoza.

Insigamigani: UTABUSYA ABWITA UBUMERA

Uyu mugani bawuca iyo babonye umuntu wese umara gushira impumu akiyibagiza amagorwa azahutseho; ahubwo agatsikamiza agahato abo bahoze bayasangiye; nibwo bavuga bati: "Koko utabusya abwita ubumera"! Wakomotse

kuri Karake ka Rugara w'i Bumbogo bwa Huro (mu Karere ka Gakenke, Intara y'Amajyaruguru); ahasaga umwaka wa 1600.

Guhera ku ngoma za kera kugeza kuri Kigeri Rwabugiri, abanyamuhango b'umuganura bagatura i Bumbogo; ndetse bakaba ari na bo batware babwo bwose. Inteko yabo yari ku musozi witwa Huro (ubu ni mu Karere ka Gakenke). Bukeye umutsoke Nyamwasa wari umutware w'abasyi icyo gihe, asaba umukobwa wo mu ngabo za Mibambwe Gisanura yise Abambogo b'umuganura. Abakobwa babo ni bo basyaga umutsima w'umuganura nyine. Uwo mukobwa yitwaga Karake, akaba mwene Rugara w'Umusegege. Agasyana n'abandi bakobwa b'urungano; ni na ho Nyamwasa yamuboneye aramushima aramusaba. Amaze kumurongora, Karake aranezerwa kuko noneho aho gusya agiye kujya ahagarikira abasyi. Ahimbarwa n'ubutwarekazi; abakobwa baje gusya akabahagarikirana urutoto abisyigizingiza yitotomba ngo barizenutsa ntibasyana umwete.

Abo bakobwa babyirukanye bakamubwira bamwenyura, bati: "Mbese ntuzi ko uburo bukomera"? Karake akabasubizanya izenezene, ati: "Ubu na bwo ni uburo si ubumera"? (ntiburuhije). Abakobwa bagatinya kumuseka ngo bitabakorera ishyano; bagasekera mu bipfunsi. Biba aho bityo. Bukeye Karake yubura ingeso yo gusinda. Nyamwasa yaza agasanganirwa n'umugono agasanga umugore yasinziye uburiri ari ibirutsi gusa: Karake si ugusinda arasayisha! Bituma umugabo we amwanga aramuzinukwa aramusenda asubira iwabo. Rubanda bari bazi ubukundwakare bwe baratangara.

Hacyeho iminsi igihe cy'umuganura w'ibwami kiragera. Bakoresha Abambogo b'umuganura bose ngo baze gusya kwa Nyamwasa. Ubwo Rugara se wa Karake yari afite umugore w'umukecuru kandi nta n'umukobwa wundi afite wo kumucungura. Biramushobera; ati: "Ibi mbigenje nte! Ko nta wundi mwana mfite; kandi ko kohereza Karake kwa Nyamwasa ngo asyane n'abo yahoze ahagarikiye byamutera ipfunwe ribi"? Abandi b'amacuti ye bati: "Nutamwohereza bizakugwa nabi". Abuze uko abigira apfa kumwohereza ajya mu basyi; ati: "Jya gusya uburo bw'ibwami nta kundi twabikika"!

Karake arashoberwa ariko aremera apfa kugenda; agenda aseta inzira ibirenge. Ageze kwa Nyamwasa abakobwa baranzika barasya, Karake abajyamo afata urusyo rwe. Agize ngo arapfukama biramutonda, agize ngo arasya biramunanira; kuko yari amaze guhuga hashize igihe kirekire ari mu mukiro. Noneho ba bakobwa baramwubahuka baramuseka baramukwena; mbese baramukwenura bamuhinyora; bati: "Nyabusa shikama usye vuba dore ubwo si uburo ni ubumera"! Bamucyurira ko igihe yakinaga n'umurengwe yari yariyibagije ko gusya uburo ari impingane.

Nuko mu mataha abakobwa batahana Karake bamuhinyora, ijamba riba gikwira i Bumbogo risakara u Rwanda riba umugani. Bawinjiza mu yindi yigisha gukora iki cyangwa kudakora kiriya. Kuva ubwo rero umuntu wese umaze gushira impumu akirengagiza amagorwa azahutsemo ntacire abo bari bayasangiye akari urutega,

bakamuciraho uwo mugani, bagira bati: “**Utabusya abwita ubumera**”! Baba bamugereranya na Karake wiyibagije ko gusya uburo ari impingane bikura amakwabasi.

Byavuye muri: Minisiteri y’Amashuri Makuru n’Ubushakashatsi mu by’Ubuhanga, *Ibirari by’insigamigani. Igitabo cya Kabiri*, Kigali, 1986

Ibibazo

1. Ibivugwa muri iyi nsigamigani bihuriye he n’imyitwarire y’umunyamwuga?
2. Sobanura inyigisho ukuye muri iyi nsigamigani n’uko iyo nyigisho izagufasha mu mwuga wawe.
3. Vuga ubwoko bw’amagambo aciyeho akarongo mu nteruro zikurikira zifatiye kuri uyu mwandiko.
 - a. Abo bakobwa babyirukanye bakamubwira bamwenyura, bati: “Mbese ntuzi ko
 - b. Abuze uko abigira apfa kumwohereza ajya mu basyi.mu: indangahantu
4. Erekana imimaro y’amagambo aciyeho akarongo mu nteruro zikurikira zifatiye kuri uyu mwandiko.
 - a. Utabusya abwita ubumera
 - b. Uyu mugani bawuca iyi babonye umuntu wese umara gushira impumu akiyibagiza amagorwa azahutsemo.
 - c. Abanyamuhango b’umuganura bagatura i Bumbogo.
5. Hanga urwenya rufatiye ku mwuga runaka cyangwa se utegure urundi waba uzi rufatiye ku mwuga ruteza imbere indangagaciro z’umuco nyarwanda maze urugeze kuri bagenzi bawe.
6. Tandukanya imvugo iboneye n’imvugo nyandagazi ugendeye ku biziranga.

Ikigwa cya 1.2: Isubiza ry'ibibazo neza akoresheje imvugo iboneye yubahiriza amategeko y'ikibonezamvugo.



Ubushobozi fatizo: Gusubiza neza ibibazo akoresheje imvugo iboneye yubahiriza amategeko y'ikibonezamvugo.

Ubumenyi	Ubumenyi ngiro	Ubukeshya
1. Kuvuga ibyitabwaho mu gusoma no gusesengura imyandiko	1. Gusoma no gusesengura imyandiko	1. Kugira umuco wo gusesengura no gutahura ubutumwa bukubiye mu mwandiko runaka
2. Kurondora ibyiciro by'inyunguramagambo: impuzanyito, imbusane, imvugwakimwe, ingwizanyito n'impuzashusho	2. Gutandukanya ibyiciro by'inyunguramagambo: impuzanyito, imbusane, imvugwakimwe, ingwizanyito n'impuzashusho no kubikoresha mu nteruro	2. Gushishikarira gukoresha impuzanyito, imbusane, imvugwakimwe, ingwizanyito n'impuzashusho
3. Gutanga inshoza y'ihinamwandiko	3. Gukora ihinamwandiko	3. Kurangwa no gutanga ubutumwa mu buryo

		buhinnye aho biri ngombwa
4.	Kuvuga icyo interuro mbonezamvugo n'interuro nyobyamvugo ari cyo	4. Gutandukanya interuro mbonezamvugo n'interuro nyobyamvugo
		4. Kwihatira gukoresha interuro mbonezamvugo no gukosora interuro nyobyamvugo

Intangiriro: Ni ibiki nzi kuri iyi nyigisho, hanyuma ni ibihe nkeneye kumenya?



Ikigwa cya 1.2 Umwitozo 1

Ugendeye ku bumenyi n'ubushobozi bwawe subiza ibibazo bikurikira.

1. Ni ibiki uzi ku nsanganyamatsiko zikurikira: Kurengera ibidukikije, uburinganire n'ubwuzuzanye, gukunda umurimo no kuwunoza?
2. Mu byiciro by'inyunguramagambo dusangamo: impuzanyito. Ibindi byiciro by'inyunguramagambo byo mu rwego nk'uru uzi ni ibihe?
3. Mu gusubiza ibibazo akoresheje imvugo iboneye yubahiriza amategeko y'ikibonezamvugo umuntu yakwita ku biki?



Igikorwa cyo gutahura ibisubizo by'ikibazo



Ikigwa cya 1.2 Umwitozo 2

1. Somera hamwe na mugenzi wawe mwegeranye inkuru ikurikira maze musubize ibibazo byayibajijweho mukoresheje imvugo iboneye yubahiriza amategeko y'ikibonezamvugo.

Impanuro zikwiye

Umugabo Kamana n'umuryango we ni abahinzi. Igitondo kimwe bazindutse baja guhinga mu murima wabo. Mu mihingire yabo, bigabanyamo ibyiciro bibiri: mu bana bakuru ab'abahungu bahingana na se naho ab'abakobwa bo na nyina Mariza bahabwa akavi gato ko guhinga bakarangiza bagatera intabire ngo kuko ari abagore batagira intege zihagije. Uwo murima wari ahantu hari ubuhaname. Maze si uguhinga barashishikara sinakubwira! Ntibigeze batekereza gucamo imiringoti yo kurwanya isuri cyangwa ngo bateremo ibyatsi ndetse n'ibiti byo kurwanya isuri. Ubwo kandi ni na ko bari bajyanye n'inka zabo kuziragira iruhande rw'aho bahingaga. Izo nka zikagenda zikajambagira mu mugezi wari hafi aho ari na ko zitamo amase ndetse zikanagangamo. Abana babo bato benshi cyane kandi b'indahekana ubwo bari biraye mu ishyamba ryari hafi aho baryangiza, abandi

bacanye ibiyorero botsamo ibijumba, bamwe muri bo bakavuga ko bashaka no kwiyotera, cyanecyane ko byari mu gihe k'imvura nyishi.

Ntibyatinze haza kunyura Mujiyambere, umujyanama w'ubuhinzi maze atungurwa n'imyumvire ndetse n'imyifatire mibi nk'iyi, yuzuyemo ubutamenya bwinshi ugereranyije n'igihe tugezemo. Yabagiriye inama yo kurengera ibidukikije, bubahiriza uburyo bwo kurwanya isuri, bita kuri gahunda yo kororera mu biraro, birinda kwangiza amashyamba, guhumanya ikirere, amazi n'ibindi binyabuzima muri rusange. Akibagira izo nama zinyuranye, na Nyirabeza, umujyanama w'ubuzima muri uwo mudugudu aba arahingutse, maze yunga mu rya Mujiyambere. Nuko yongeraho ko bakwiye no kwitabira gahunda yo kuboneza urubyaro, kuko ubwiyongere bukabije bw'abaturage na bwo bugira uruhare mu kwangiza ibidukikije.

Yongeyeho kandi ko bagomba kwita ku ihame ry'uburinganire n'ubwuzuzanye kuko ari ishingiro ry'iterambere ry'umuryango w'abantu. Abasobanurira ko hakwiye kubaho kureshya kw'ibitsina byombi imbere y'amategeko, abantu b'ibitsina byombi bagahabwa uburenganzira bungana mu mashuri, mu mirimo no mu nzego z'ubuyobozi. Asoza agira ati: "Ingamba zo kwita ku buryo bw'umwihariko ku bari barakandamijwe, tutibagiwe n'amategeko arengera by'umwihariko abagore muri rusange bigomba kurushaho kwitabwaho.

Kamana n'abagize umuryango we babanje gutsimbarara, bavuga ko kuva kera mu mateka y'u Rwanda ariko byahozze. Bakavuga ko mu muco nyarwanda, abagore n'abakobwa bakoraga imirimo iciriritse, kandi bagacisha make kuko banacaga umugani ngo: "Nta nkokokazi ibika isake ihari" ngo n'ibyo by'uburenganzira bwabo si byo kuko Abanyarwanda bavuga ngo: "Uruvuze umugore ruvuga umuhoro". Ariko nyuma baza kwemera impanuro, biyemeza ko bagiye kuzishyira mu bikorwa uhereye uwo munsu. Basaza bavugira icyarimwe bati: "Si ibyo gusa, ahubwo tugiye no kurushaho gukunda umurimo: tuwushishikarira, dukora umurimo unoze kandi ufite ireme, dukorera hamwe, dukorera ku gihe, duhanga imirimo mishya tunavugurura imikorere, turangiza ibyo twatangiye, ducunga neza umutungo, duteganya, twigira, kandi tugira umuco wo guhiganwa no kuba indashyikirwa".

Ibibazo:

- a. Ni ba nde bavugwa muri iyi nkuru?
 - b. Abashyitsi basuye umuryango wa Kamana bakora uwuhe mwuga?
 - c. Garagaza insanganyamatsiko zavuzweho muri iyi nkuru.
 - d. Hina uyu mwandiko mu mirongo itarenze 10.
2. Mwitagereze interuro zikurikira maze mutahure imiterere y'amagambo aciyeho akarongo mu rwego rw'inyito zayo (ibisobanuro byayo).
- a. Kamana n'abahungu be bafashe ikivi kinini bavuga ko bafite imbaraga nyinshi naho umugore n'abakobwa bafata gito ngo kuko batagira intege zihagije.
 - b. Yabagiriye inama yo kurengera ibidukikije aho kubyangiza.

- c. Abagore n’abakobwa si bo bonyine bagombaga gutera intabire no gutera ipasi.
 - d. Abana ba Kamana bato bagiriwe inama yo kutangiza amashyamba.
Abana b’uriya musaza bose barashatse.
 - e. Inkoko yanitseho amasaka bayishyira hejuru y’agatanda kugira ngo inkoko zitayatora.
3. Mwitagereze amatsinda y’interuro ebyirebyiri zikurikira maze muvuge aho zigiye zitandukanira.
- a. Ejobundi hazaza narebye umukino ushimishije.
Ejobundi hashize narebye umukino ushimishije.
 - b. Uyu munyeshuri agenda neza.
Uyu munyeshuri tugenda neza.
 - c. Umwarimu n’umunyeshuri yubahiriza amabwiriza.
Umwarimu n’umunyeshuri bubahiriza amabwiriza.

1.3 Ingingo z’ingenzi zo kwitabwaho

- **Mu kurengera ibidukikije:** habamo kurwanya isuri, kororera mu biraro, kwirinda kwangiza amashyamba, kwirinda guhumanya ikirere, amazi n’ibindi. Twibuke ko umuntu ari we kidukikije cya mbere gikwiye kubungabungwa kugira ngo na cyo kibone uko kibungabunga ibindi bidukikije.
 - **Uburinganire n’ubwuzuzanye:** kureshya kw’ibitsina byombi imbere y’amategeko, guhabwa uburenganzira bungana mu mashuri, mu mirimo no mu nzego z’ubuyobozi, kwita ku buryo bw’umwihariko ku bari barakandamijwe (abagore) no gufatanya mu mirimo cyangwa inshingano.
- Gukunda umurimo no kuwunoza:** gushishikarira umurimo, gukora umurimo unoze kandi ufite ireme, gukorera hamwe, gukorera ku gihe, guhanga imirimo mishya no kuvugurura imikorere, kurangiza ibyo watangiye, gucunga neza umutungo, kuteganya, kwigira, kugira umuco wo guhiganwa no kuba indashyikirwa.

Mu byiciro by’inyunguramagambo dusangamo: impuzanyito, imbusane, imvugwakimwe, ingwizanyito n’impuzashusho.

Mu gusubiza ibibazo akoresheje imvugo iboneye yubahiriza amategeko y’ikibonezamvugo umuntu yakwita kuri ibi bikurikira: Kumenya guhina ubutumwa bukubiye mu mwandiko/inkuru, gukoresha interuro mbonezamvugo yirinda interuro interuro nyobyamvugo.

Bimwe mu biranga:

Interuro nyobyamvugo: kuba ivuga ibizaza nk’ibirimo kuba ubu, ivuga ibintu byinshi nk’aho ari kimwe, idasanishije neza...

Interuro mbonezamvugo: kuba ivuga ibintu mu gihe byabereye, ibintu byinshi kandi ikabivuga mu bwinshi nk’uko bikwiye kuvugwa, isanishije neza...

Ikitonderwa: ku bijyanye n’interuro mbonezamvugo na nyobyamvugo, hari benshi bazi ko interuro yose ivuga ibidashoboka iba ari interuro nyobyamvugo, ariko si byo. Ahubwo interuro yose yujwwe amategeko y’ikibonezamvugo iba ari mbonezamvugo kabone niyo yaba ivuga ibidashoboka.

Ingero:

- Uyu mukambwe afite imyaka itatu y’amavuko.
- Nahuye n’imbaragasa ku Karushengura icebe ryayivunnye.
- Umubeshyi w’ikinyoma ati: “Umuyaga ni igaju”.
- Ibi biryo byatetse umuhanga.



Igikorwa cy’ umwitozo wunganiwe



Ikigwa cya 1.2 Umwitozo 3

Ongera usome inkuru “**Impanuro zikwiye**” maze usubize ibibazo bikurikira wubahiriza amabwiriza yatanze kuri buri kibazo.

1. Nimusome umwumwe, igika ku gika iyi nkuru muranguruye ijwi.
2. Mu matsinda mato nimugaragaze ingingo z’umuco n’iz’amateka dusanga muri iyi nkuru.
3. Buri wese ku giti ke, nimukoreshe amagambo akurikira mu nteruro:
 - a. Ubuhana
 - b. Imiringoti
 - c. Umurimo unoze
4. Nimukorere mu matsinda mato maze musesengure umwandiko mwasomye, muwujore mugaragaza ibyo mwanenze n’ibyo mwashimye mu byavuzwemo.
5. Interuro mbonezamvugo n’interuro nyobyamvugo zitandukaniye he?



Igikorwa cy’umukoro ngiro



Ikigwa cya 1.2 Umwitozo 4

Subiza ibibazo bikurikira wubahiriza ibisabwa.

1. Nimwongere musome umwandiko “**Impanuro zikwiye**” umwumwe muranguruye maze musubize ibi bibazo.
 - a. Uramutse ufite umurima uhanamye wabigenza ute mu kuwuhinga kugira ngo uzabone umusaruro wifuza?
 - b. Ni izihe ngaruka ubona kuragira amatungo ku gasozi byateza?
 - c. Kugira ngo utunganye umwuga wawe wumva uzabigenza ute?

2. Tanga urugero kuri buri kiciro k'inyunguramagambo (impuzanyito, imbusane, imvugwakimwe, ingwizanyito n'impuzashusho).
3. Tanga interuro ebyiri nyobyamvugo zubatse mu buryo butandukanye maze werekane uko zakosorwa ngo zibe interuro mbonezamvugo.



Iby'ingenzi ngomba kwibuka:


- Kutitiranya ibyiciro by'amagambo y'inyunguramagambo
- Mu guhina umwandiko umuntu ntangomba kurenza 1/3 cy'umwandiko yahawe.



Isuzuma rinoza imygire n'imyigishirize

1. Ongerera usome umwandiko "Impanuro zikwiye" uwukoremo umwandiko uhinnye utarengeje imirongo 10.
2. Vuga nibura umunyarubuga (umukinankuru) umwe wanenze muri uwo mwandiko ugaragaze n'icyo wamunenze.
3. Vuga noneho nibura umunyarubuga (umukinankuru) umwe washimye muri uwo mwandiko ugaragaze n'icyo washimye.
4. Erekan ubutumwa bukuru wakuye mu mwandiko "Impanuro zikwiye" maze ugaragaze n'icyo buzagufasha mu buzima bwawe.
5. Shaka interuro kuri buri kiciro mu byiciro by'inyunguramagambo twize (impuzanyito, imbusane, imvugwakimwe, ingwizanyito n'impuzashusho).
6. Sobanura itandukaniro riri hagati y'interuro nyobyamvugo na mbonezamvugo usobanure n'akamaro kko kubyiga.

Ikigwa cya 1.3. Ukuganira mu buryo buboneye agaragaza ibitekerezo bye ashingiye ku nsanganyamatsiko yatoranyijwe



Ubushobozi fatizo: Kuganira mu buryo buboneye agaragaza ibitekerezo bye ashingiye ku nsanganyamatsiko yatoranyijwe

Ubumenyi	Ubumenyi ngiro	Ubukeshya
1. Kuvuga inshoza, uturango n'itegurire by'ikiganiro nyunguranabitekerezo	1. Gutegura no gutanga ikiganiro nyunguranabitekerezo	1. Gushishikarira kwitabira ibiganiro nyunguranabitekerezo no kubigiramo uruhare
2. Kuvuga inshoza y'ikiganiro mpaka no kugaragaza imbata yacyo	2. Gutegura no kuyobora ikiganiro mpaka	2. Gushishikarira kwitabira ibiganiro mpaka no kubigiramo uruhare

Intangiriro: Ni ibiki nzi kuri iyi nyigisho, hanyuma ni ibihe nkeneye kumenya?



Ikigwa cya 1.3 Umwitozo 1

Koresha ubumenyi n'ubushobozi bwawe maze usubize ibi bibazo.

1. Iyo hari ikibazo cyangwa ingingo abantu bifuza kuganiraho ngo bagire imyanzuro bafata babigenza bate?
2. Mu rwego rwo kuzamura imitekerereze y'abantu ku ngingo ishobora kutavugwaho rumwe n'abantu batandukanye hakorwa iki?



Igikorwa cyo gutahura ibisubizo by'ikibazo



Ikigwa cya 1.3 Umwitozo 2

Soma umwandiko ukurikira, ukoreshe n'ubumenyi bwawe usubize ibibazo byatanze.

Ikiganiro ku kubungabunga amashyamba

- **Umuyobozi (w'umugore):** Mwaramutseho mwese!
- **Abitabiriye ikiganiro:** Mwaramutse muyobozi!
- **Umuyobozi:** Mbashimiye ubwitabire bwanyu muri iyi gahunda. Nk'uko mwabimenyeshejwe rero, tugiye kuganira n'umutumirwa wacu, nkaba ngira ngo muhe umwanya wo kubibwira kugira ngo tuganire tuziranye.
- **Umutumirwa:** Muraho mwese!
- **Abitabiriye:** Yego turaho!
- **Umutumirwa:** Nitwa Umugiraneza. Ndi impuguke mu bijyanye no kubungabunga amashyamba. Nishimiye kubana namwe kuri uyu munsu kugira ngo tuganire. Nizere ko mu kiganiro cyacu twunguka ibintu byinshi.
- **Abitabiriye:** Amashyi ngo: "Kacikaci"!
- **Umuyobozi:** Umutumirwa arakoze kubibwira. Reka rero tumurekere umwanya mukomeze muganira.
- **Umutumirwa:** Nk'uko gahunda yacu iteganyijwe rero, reka tuganire ku kibazo kitwugarije twungurane inama z'uko cyakemuka. Muribuka mwese ingingo tugiye kuganiraho?
- **Abitabiriye:** Yego, turayibuka.
- **Umutumirwa:** Nihagire uyisubiramo mu ijwi riranguruye.
- **Umwe mu bitabiriye:** Ni ingingo yo kubungabunga amashyamba.
- **Umutumirwa:** Urakoze cyane! Ikibazo gihari ni ikihe?
- **Umwe mu bitabiriye:** Ni ikibazo cy'abantu bangiza amashyamba.
- **Umutumirwa:** Mubona bayangiza mu buhe buryo?

- **Umwe mu bitabiriye:** Bamwe bitwikira ijoro bakayatema atarera, abandi bakayaragiramo amatungo, bakayatwikamo amakara...
- **Umutumirwa:** Mwe mutekereza ko hakagombye gukorwa iki?
- **Umwe mu bitabiriye:** Leta ikwiye guhana abangiza amashyamba.
- **Umutumirwa:** Ibyo rwose ni byo, ariko tugomba kumenya ko uruhare runini ari urwacu abaturage. Abo bayangiza tugomba kubagira inama tubasobanurira akamaro k'amashyamba: atanga umwuka duhumeka, akarinda ahantu kuba ubutayu, agakurura imvura, hanyuma yasarurwa yeze neza agatanga n'umusaruro uhagije w'ibikoresho byose tuzi bikorwa mu biti. Tugomba kubibutsa rero ko mu gihe bayangije ingaruka na bo zabageraho. Igihe babirenzeho, noneho mukabashyikiriza inzego zibishinzwe zikabagira inama z'umwihariko.
- **Umwe mu bitabiriye:** Rwose izo nama mutugiriye ni ingirakamaro, naho ubundi twayoberwaga icyo twakora.
- **Umutumirwa:** Nange mbashimiye uruhare mugaragaje mu kungurana inama kuri iki kibazo cyari gihangayikishije. Murakoze. Nshimiye kandi n'umuyobozi wanyu wagize uruhare mu kuntumira ngo nze tuganire.
- **Umutumirwa:** Arakoze cyane umutumirwa wacu ku bw'inama nziza atugiriye! N'ikindi gihe tuzamukenera tuzamutumira aze kutwungura inama. Mukomeze kugira umunsi mwiza mwese kandi mugere mu rugo amahoro.

Ibibazo:

- a. Aba bantu barimo kuganira ku yihe nsanganyamatsiko?
- b. Ni ikihe kibazo k'ingutu cyugariye abatuye mu gace kabo?
- c. Ni iyihe nama umutumirwa yabagiriye mu rwego rwo gukemura icyo kibazo?
- d. Uyu mwandiko urabona ari bwoko ki? Sobanura impamvu.
- e. Tanga inshoza y'ikiganiro nyunguranabitekerezo.
- f. Erekanako uturango tw'ikiganiro nyunguranabitekerezo ukurikije icyo twasomye.
- g. Tanga inshoza y'ikiganiro mpaka.

1.4 Ingingo z'ingenzi zo kwitabwaho

- **Ibiganiro nyunguranabitekerezo**
Ibiganiro nyunguranabitekerezo ni ibiganiro bifite intego yo gukusanya ibitekerezo ku ngingo runaka ihangayikishije abantu. Utegura ikiganiro nyunguranabitekerezo atumira inzobere n'inararibonye akaziha umurongo ku byo yifuza ko zimuhaho ibitekerezo. Iyo ibitekerezo bibonetse, bituma hafatwa ingamba n'umurongo wo gukemura icyo kibazo.
Hari n'ubwo ibyo baganiraho aba atari ibyo kwiga ku bibazo ahubwo ari ugushakisha umurongo mwiza w'imikorere. Nk'ikiganiro nyunguranabitekerezo cyakorwa ku guteza imbere amashuri y'ubumenyi ngiro.
- **Ikiganiro nyunguranabitekerezo kiba kirimo:** Umuyobozi w'ikiganiro, inzobere/inraribonye ku nsanganyamatsiko n'abitabiriyeye ikiganiro.
- Mu kiganiro mpaka itsinda rimwe ritanga ibitekerezo bishyigikira ibikubiye mu nsanganyamatsiko, irindi rigatanga ibitekerezo bibivuguruza, naho irya gatatu rigatega amatwi ibitekerezo bitangwa n'izo mpande zombi maze rigafatanyaga n'abayoboze ikiganiro mpaka mu gufata umwanzuro. Habamo kandi n'ushinzwe gucunga igihe ndetse n'irindi tsinda ry'indorererezi (ritagira aho ribogamiye).



Igikorwa cy' umwitozo wunganiwe



Ikigwa cya 1.3 Umwitozo 3

Subiza ibibazo wubahiriza amabwiriza yatanze.

1. Tanga izindi ngero z'ingingo zishora kuganirwaho mu kiganiro nyunguranabitekerezo mu kigo k'ishuri cyangwa mu rwego rw'igihugu.
Ku rwego rw'ishuri
Ku rwego rw'igihugu
2. Imitegurire y'ikiganiro nyunguranabitekerezo ikorwa ite?
3. Ikiganiro nyunguranabitekerezo gitandukaniye he n'ikiganiro mpaka?
4. Imbata y'ikiganiro mpaka ibateye ite?



Igikorwa cy' umukoro ngiro



Ikigwa cya 1.3 Umwitozo 4

Subiza ibibazo bikurikira ukurikije ibisabwa.

1. Kuki habaho ibiganiro nyunguranabitekerezo?
2. Mu matsinda ya batandaturatandatu nimutegure ikiganiro nyunguranabitekerezo kuri imwe muri izi nsanganyamatsiko zikurikira:
 - Abantu bashobora kwimakaza gukunda umurimo no kuwunoza.
 - Kwamagana no kurwanya imirimo ivunanye ikoreshe abana nko muri za kariyeri.
3. Tegura ikiganiro mpaka ku nsanganyamatsiko igira iti: **"Nta mirimo iyi n'iyi igenewe abantu b'igitsina gore cyangwa ab'igitsina gabo; ahubwo bese bashobora kuyikora"**.

Garagaza nibura ibyiciro bitatu by'ingenzi (by'ibanze) by'abantu wakoresha muri icyo kiganiro mpaka, wandike mu nshamake ibyo buri kicio mu ibyo bitatu kigenewe kuvuga.



Iby'ingenzi ngomba kwibuka:

- **Intego y'ibiganiro mpaka:**
Ibiganiro mpaka bihuza impande ebyiri ngo barebe icyo bakumvikanaho gikwiye gukurikizwa ku mpande zombi. Ibiganiro mpaka bibera mu mashuri byo bituma abanyeshuri baba intyoza mu kuvuga, bakaba imbonera mu gutega amatwi ibivugwa no mu gutanga ingingo zifite ireme.
- **Abagize ibiganiro mpaka**
Uruhande rushyigikira insanganyamatsiko, uruhande ruyihakana, umuyobozi/ umuhuza w'ibiganiro mpaka, abakemurampaka (indorerezi).
- **Inshingano z'umuhuza z'ingenzi ni izi zikurikira:**
Gusobanura insanganyamatsiko, gutanga umurongo ngenderwaho, gutanga umwanya w'amagambo kuri buri ruhande, gufasha mu kumvikanisha impande zombi no kugeza impande zombi ku mwanzuro.



Isuzuma rinoza imyigire n'imyigishirize

Uyu mwanya wagenewe ibibazo byo gusuzuma uko wumvise inyigisho irangiye.

- a. Tandukanya ikiganiro nyunguranabitekerezo n'ikiganiro mpaka ugendeye ku turango twabyo.

- b.** Mu matsinda ya batandatubatandatu nimutegure ikiganiro nyunguranabitekerezo ku nsanganyamatsiko mwihitiyemo ijyanye n’umwe mu myuga ikorewa mu gihugu cyacu.
- c.** Tegura ikiganiro mpaka ku nsanganyamatsiko wihitiyemo.

Ikigwa cya 1.4: Imurika ry'ibihangano bye mu buryo bunoze akoresheje imvugo iboneye, interuro zuzuye, yubahiriza amabwiriza y'isanisha, utwatuzo n'isesekaza.



Ubushobozi fatizo: Kumurika ibihangano bye mu buryo bunoze akoresheje imvugo iboneye, interuro zuzuye, yubahiriza amabwiriza y'isanisha, utwatuzo n'isesekaza.		
Ubumenyi	Ubumenyi ngiro	Ubukeshya
1. Kuvuga inshoza n'uturango by'indirimbo	1. Guhanga no kuririmba indirimbo	1. Kujora indirimbo n'ubutumwa bukubiyemo
2. Kuvuga inshoza n'uturango by'umuvugo	2. Guhanga no kuvugira umuvugo imbere y'abandi	2. Gushishikarira kuvuga imivugo itanga ubutumwa
3. Kuvuga amoko y'interuro n'ingiro zikoreshwamo	3. Gukoresha neza amoko y'interuro n'ingiro	3. Kujora interuro zinyuranye no guharanira kuzikoresha neza
4. Kuvuga amategeko y'isanisha n'utwatuzo tw'ibanze	4. Kubahiriza isanisha n'utwatuzo tw'ibanze	4. Kwihatira kubahiriza isanisha n'utwatuzo tw'ibanze

 **Intangiriro: Ni ibiki nzi kuri iyi nyigisho, hanyuma ni ibihe nkeneye kumenya?**



Ikigwa cya 1.4 Umwitozo 1

Ugendeye ku bumenyi n'ubushobozi bwawe subiza ibibazo bikurikira.

1. Ni ibiki uzi ku muvugo n'indirimbo?
2. Ukurikije ubutumwa bukubiye mu nteruro usanga zirimo ayahe moko?



Igikorwa cyo gutahura ibisubizo by'ikibazo



Ikigwa cya 1.4 Umwitozo 2

1. **Soma umwandiko ukurikira usubize ibibazo byawubajijweho.**

TURATE RWANDA YACU

1. Turate Rwanda yacu itatse inema
Rwanda yacu nziza gahorane ishya
Gitego cyatatswe ubwiza na Rurema
Hose baraguharaniraa!

*Rwanda nzii nziza
Ntuteze kuzahinyuka mu mahanga
Rwanda nzii nziza
Abawe baguhaye impundu!*

2. Ufite ibirunga nka Muhabura
Ni cyo gikuru mu birunga by'ino
Ni wo munara w'uru Rwanda rwacu
Aho uri hose uba ukitegeye!

3. Twavuga iki se ku mazi magari?
Nka Kivu na Muhazi ya Buganza
Burera na Ruhondo byo mu Murera
Cyohoha inetesha Bugesera!

4. Hari ubwo se mwageze mu mukenke
Ngo mureze impara n'imparage se?
Hari ubwo se mwageze mu mashyamba
Ngo mureze ingwe n'urusamagwe?

Inyunguramagambo

Sobanura amagambo akurikira:

Inema

Ishya

Igitego

Guhinyuka

Umunara

Ukitegeye

Amazi magari

Inetsha

Umukenke

2. Ibibazo ku mwandiko

- a. Uyu mwandiko uvuga ku yihe ngingo?
- b. Ukurikije ibivugwamo urabona werekeza ku ki?
- c. Wabihuza n'uwuhe mwuga mu ikorerwa mu Rwanda?
- d. Uyu mwandiko urangwa n'iki ?
- e. Umwandiko uteye utyo uri mu buhe bwoko bw'umwandiko?



Ikigwa cya 1.4 Umwitozo 3

1. Soma umwandiko ukurikira usubize ibibazo byawubajijweho.

Turate umurimo

Turate umurimo mwiza
Mwiza utunze bese
Igihe cyose tuwuririmbe
Tuwuhe agaciro ukwiye
5. Tuwurate utunze bese.

Uko bukeye abawitabiriye
Ubaha ihaho umunsi ukira
Kuzigama ubwo bikaza
Tuwuharanire rwose twese
10. Tuwurate utunze bese.

Abawuhanze urabatunze
Iby'ubushonji byarahunze
Iterambere ryarashinze
Imizi imaze gusagamba
15. Tuwurate utunze bese.

Mucyo tuwukunde twese
Uzadutunga abacu bese
Bazadushime batwigane
Bityo ubukungu bwiyongere
20. Tuwurate utunze bese.

Ubukungu bwiyongere
Ikererekezo cyacu ni icyo
Ubunabwwe tubukumire
Urwatubyaye rugere heza
25. Tuwurate utunze bese.

2. Uyu mwandiko urangwa n'iki ?

Urangwa no kuba:...

- a.** Umwandiko uteye utyo uri mu buhe bwoko bw'umwandiko?
- b.** Ni ubuhe butumwa bukuru bukubiye muri uyu mwandiko?



Ikigwa cya 1.4 Umwitozo 4

1. Itegereze interuro zikurikira, wite ku butumwa buzikubiyemo maze ugire icyo uzivugaho.
 - a. Tuwurate utunze bose.
 - b. Twavuga iki se ku mazi magari?
 - c. Mbega ukuntu u Rwanda rutatswe n'ibyiza bihebujee!
 - d. Jya wita ku murimo ushinze.

Igisubizo:

1. ...
2. ...
3. ...
4. ...

1.5 Ingingo z'ingenzi zo kwitabwaho

- **Indirimbo** irangwa no kuba:
 - Yanditse mu mikarago
 - Isingiza ikintu runaka
 - Buri mukarago utangijwe inyuguti nkuru
 - Ibamo uturango tw'ikeshamvugo (isubirajwi, isubirajambo, imizimizo...)
 - Igizwe n'ibitero n'inyikirizo
 - Bayisoma baririmba hakurikijwe amajwi yo muri muzika
- **Umuwugo** urangwa no kuba:
 - Wanditse mu mikarago
 - Usingiza ikintu runaka
 - Buri mukarago utangijwe inyuguti nkuru
 - Ururirimbo (gutondagurwa hubahirizwa inyana yawo)
 - Urimo uturango tw'ikeshamvugo (isubirajwi, isubirajambo, imizimizo...)
- Ukurikije ubutumwa bukubiye mu nteruro usanga zirimo amoko ane: **interuro ihamya, ibaza, itangara n'itegeka.**



Igikorwa cy' umwitozo wunganiwe



Ikigwa cya 1.4 Umwitozo 5:

Ongera usome indirimbo “**Turate Rwanda yacu**” n’umuvugo “**Turate umurimo**” maze usubize ikibazo gikurikira:

Ugendeye no ku miterere yabyo tanga inshoza y’indirimbo n’iy’umuvugo.

Urugero: Indirimbo: ni ubwoko bw’igihangano bavuga baririmba. Igira umutwe ari wo zina ryayo, ikagira ibitero n’iyikirizo igenda isubirwamo nyuma ya buri gitero.

Umuwugo: ni ...



Ikigwa cya 1.4 Umwitozo 6

Subiza ibibazo bikurikira:

1. Mu nteruro zikurikira, itegereze inshinga ziciyeho akarongo maze uvuge ingiro zitondaguyemo usobanure n'impamvu.
 - a. Gitego **cyatatswe** ubwiza na Rurema.
 - b. Hose **baraguharanira**!
 - c. Abantu **bikunda** cyane babangamira abandi.
2. Itegereze interuro zikurikira ugire icyo uzivugaho ku bijyanye n'isanisha, nurangiza werekane amagambo agenga isanisha yakoreshejwe muri izo nteruro.
 - a. Ndavuze ati: «Ejo tuzafatanye gukora umukoro».
 - b. Umwana wanyu bagiye.
 - c. Urukwavu n'inka birya ubwatsi.
 - d. Wowe na we baraje.
 - e. Abanyeshuri biga neza ni bo batsinda neza.
3. Itegereze interuro zikurikira utahure utwatuzo tw'ibanze twakoreshejwemo n'aho dukoreshejwe.
 - a.
 - Umwana mwiza yumvira ababyeyi.
 - Mpereza icyo gitabo.
 - b.
 - Uzajya i Kigali ryari ngo tuzajyane?
 - c.
 - Mbega ukuntu kino kiyaga ari kinini!
 - d.
 - Umunyeshuri ushaka kujijuka, yirinda gusiba, ntakubagane mu ishuri kandi agakurikiza inama z'umwarimu.

1.6 Ingingo z'ingenzi zo kwitabwaho

- **Indirimbo:** ni ubwoko bw'igihangano bavuga baririmba. Igira umutwe ari wo zina ryayo, ikagira ibitero n'iyikirizo igenda isubirwamo nyuma ya buri gitero.
- **Umuvugo:** ni umwandiko ugizwe n'urusobe rw'amagambo ahimbitse neza ku buryo bunyura uyumva cyangwa uyasoma. Urangwa no kuba:
 - Wanditse mu mikarago
 - Usingiza ikintu runaka
 - Buri mukarago utangijwe inyuguti nkuru
 - Ururirimbo (gutondagurwa hubahirizwa inyana yawo)

- Ingiro **nkora** irangwa n’uko igikorwa gikubiye mu nshinga gikorwa na ruhamwa. Ingiro **ntega** irangwa n’uko igikorwa gikubiye mu nshinga gikorewa kuri ruhamwa. Ingiro **ngaruka** irangwa n’uko igikorwa gikubiye mu nshinga gikorwa na ruhamwa ariko ari na yo ikikoreraho.
- Utwatuzo tw’ibanze dukoresha mu Kinyarwanda ni:
 - **Akabago/akadomo (.)**: gasoza interuro ihamya n’interuro iri mu ntegeko.
 - **Akabazo (?)**: gasoza interuro ibaza.
 - **Agatangaro (!)**: gasoza interuro itangara, kagashyirwa n’inyuma y’amarangamutima.
 - **Akitso (,)**: gakoreshwa mu nteruro kugira ngo bahumeke (baruhuke) akanya gato.



Igikorwa cy’ umukoro ngiro



Ikigwa cya 1.4 Umwitozo 7

1. Tandukanya indirimbo n’umuvugo ugendeye ku turango twabyo.
2. Itegereze interuro zikurikira utahure utwatuzo tw’ibanze twakoreshejwemo n’aho dukoreshwa:
 - a. Utazi ubwenge ashima ubwe.
 - b. Wabonye amanota angahe?
 - c. Ntoye isaro ryiza mama weeee!
 - d. Abagiye inama, Imana irabasanga.



Iby’ingenzi ngomba kwibuka:

- Indirimbo bayiririmba bubahiriza injyana yo muri muzika kandi muri rusange ikagira n’inyikirizo bagenda basubiramo nyuma ya buri gitero. Mu gihe umuvugo wo ugizwe n’urusobe rw’amagambo ahimbitse neza ku buryo bunyura uyumva cyangwa uyasoma.
- Uwandika agomba kwibuka gukoresha utwatuzo tw’ibanze ari two: **akabago/akadomo, akabazo, agatangaro n’akitso.**



Isuzuma rinoza imyigire n’imyigishirize

Uyu mwanya wagenewe ibibazo byo gusuzuma uko wumvise inyigisho irangiye.

Soma uyu mwandiko usubize ibibazo byawubajijweho. Ibyo bibazo ku mwandiko hamwe n'ibindi byiyongeraho uzabigezwaho n'umutoza.

1. Hanga indirimbo uyirimbire bagenzi bawe mu ishuri wigana uko bikorwa mu vugo no mu ngiro.

Umutoza azareba wahanze indirimbo ikwiye kandi ukayirimba neza.

2. Hanga umuvugo uwutondagurire imbere ya bagenzi bawe wigana uko bikorwa mu vugo no mu ngiro.

Umutoza azareba ko wahanze umuvugo mwiza kandi ukawutondagura neza.

3. Shaka nibura ingero ebyiri z'interuro z'amoko anyuranye, nurangiza uzikure mu ngiro imwe uzihindure mu yindi ngiro zitari zirimo (ingiro nkora, ingiro ntega cyangwa ingiro ngaruka).

Umutoza azareba ko wanditse interuro ziri zo ukanazihindurira ingiro zari zirimo.



Kwisuzuma: Uyu mwitozo uzawukora wunganiwe n'umutoza.

1. Uzuza imbonerahamwe ikurikira.

Nkuko byavuzwe ku ntangiriro yiyi mbumbe, nta buryo buri bwo cyangwa ubutari bwo bwo gusubiza iki kibazo; ahubwo ni ibigufasha wowe ubwawe muri iyi nyigisho. Tekereza wowe ubwawe. Niba nyuma yo kwiga iyi mbumbe irangiye, ibi noneho washoboye kubikora n'ikigero ubishoboyeho. Soma ibibanza mu kazu ko hejuru hanyuma ushyire akamenyetso aho ubona hajyanye n'ikigero cy'uko ubyumva.

Inararibonye ryange	Nta kintu na kimwe nzi ku mikoreshere ze yabyo.	Nziho bike.	Nziho ibiringaniye.	Nziho byinshi.	Ndiyizeye ku mikoreshere ze yabyo.
Ubumenyi, ubumenyi ngiro n'ubukeshya					
Kuvuga amoko y'imvugo					
Kurondora amoko n'imimaro by'amagambo biboneka mu nteruro					
Kugaragaza ibiranga urwenya					
Gutandukanya amoko y'imvugo					
Kugaragaza amoko n'imimaro by'amagambo mu nteruro					
Gutera urwenya					
Kuvuga ibyitabwaho mu gusoma no gusesengura imyandiko					
Kurondora ibyiciro by'inyunguramagambo: impuzanyito, imbusane, imvugwakimwe, ingwizanyito n'impuzashusho					
Gutanga inshoza y'ihinamwandiko					
Kuvuga icyo interuro mbonezamvugo n'interuro nyobyamvugo ari cyo					
Gusoma no gusesengura imyandiko					
Gutandukanya ibyiciro by'inyunguramagambo:					

impuzanyito, imbusane, imvugwakimwe, ingwizanyito n'impuzashusho no kubikoresha mu nteruro					
Gukora ihinamwandiko					
Gutandukanya interuro mbonezamvugo n'interuro nyobyamvugo					
Kuvuga inshoza, uturango n'imategurire by'ikiganironyunguranabiteker ezo					
Kuvuga inshoza y'ikiganiro mpaka no kugaragaza imbata yacyo					
Gutegura no gutanga ikiganiro nyunguranabitekerezo					
Gutegura no kuyobora ikiganiro mpaka					
Kuvuga inshoza n'uturango by'indirimo					
Kuvuga inshoza n'uturango by'umuvugo					
Kuvuga amoko y'interuro n'ingiro zikoreshwamo					
Kuvuga amategeko y'isanisha n'utwatuzo tw'ibanze					
Guhanga no kuririmba indirimo					
Guhanga no kuvugira umuvugo imbere y'abandi					
Gukoresha neza amoko y'interuro n'ingiro					
Kubahiriza isanisha n'utwatuzo tw'ibanze					

2. Uzuza iyi mbonerahamwe kandi wibuke kwereka umutoza ibyo wujemo.

Iyakozwe neza	Ibikeneye kongerwamo imbaraga	Ibikorwa byakwifashishwa mu kongera imbaraga aho bikenewe
1.	1.	1.
2.	2.	2.

Imbumbe ya 2:

Ugusoma n'itahura ry'amakuru n'ingingo z'ingenzi mu mwandiko yasomye

Ibyigwa

- 2.1 Ugusoma neza aranguruye yubahiriza utwatuzo n'isesekaza
- 2.2 Isesengura ry'umwandiko uko bikwiye ashingiye ku buryo bwo gusoma agamije gutahura amakuru akenewe
- 2.3 Ukugaragaza neza ingingo z'ingenzi z'umwandiko agendeye ku bika biwugize
- 2.4 Ihina ry'umwandiko akurikiranya neza ibitekerezo ashingiye ku ingingo z'ingenzi

Inshamake y'imbumbe ya 2:

Muri iyi mbumbe dusangamo inyigisho yo gusoma neza umuntu aranguruye, yubahiriza utwatuzo n'isesekaza aho tubona ko mu gusoma neza, usoma agomba kubahiriza utwatuzo n'isesekaza ari byo bivuga gusoma ugaragaza amarangamutima yerekana neza uko ubutumwa bukubiye mu nteruro buteye. Agomba kandi kwita ku magambo y'impuzashusho akoresha ubutinde n'amasaku nk'amajwi shingiro.

Harimo kandi isesengura ry'umwandiko uko bikwiye ashingiye ku buryo bwo gusoma agamije gutahura amakuru akenewe nko kwita ku ihame ry'uburinganire n'ubwuzuzanye, kurengera ibidukikije no gukunda umurimo ndetse no kuwunoza. Hakanyongeraho no gutahura mu mwandiko ingingo z'umuco n'iz'amateka.

Hagaragaramo nanone uburyo bwo kugaragaza neza ingingo z'ingenzi z'umwandiko hagendewe ku bika biwugize. Tukabonamo ko imbata y'umwandiko igizwe n'ibice bine ari byo umutwe, intangiriro, igihimba n'umusozo.

Hanyuma, hakabonekambo ibijyanye no guhina umwandiko hakurikiranywa neza ibitekerezo cyangwa ingingo z'ingenzi hanitabwa no ku magambo ahuza ibika.



Gusuzuma ubushobozi umutozwa afite ku nyigisho igiye kwigwa: Imbumbwe ya 2


1. Itegereze ishusho. Urabonaho iki? Ibyo ubonaho urabona biganisha ku ki? Utekereza ko muri iyi mbumbwe twigamo iki?
2. Uzuza imbonerahamwe ikurikira.

Nta buryo buri bwo cyangwa ubutari bwo bwo gusubiza iki kibazo; ahubwo ni ibigufasha wowe ubwawe muri iyi nyigisho. Tekereza wowe ubwawe. Niba ibi ushoboye kubikora n'ikigero ubishoboyeho. Soma ibibanza mu kazu ko hejuru hanyuma ushyire akamenyetso aho ubona hajyanye n'ikigero cy'uko ubyumva.

Inararibonye ryange	Nta kintu na kimwe nzi ku mikoreshereze yabyo.	Nziho bike.	Nziho ibiringaniye.	Nziho byinshi.	Ndiyizeye ku mikoreshereze yabyo.
Ubumenyi, ubumenyi ngiro n'ubukeshya					
Kuvuga uburyo bwo gusoma					
Kurondora amoko y'utwatumye twungirije					
Gutahura ibihakane bigizwe n'inyuguti zirenze ebyiri mu mwandiko					
Gusobanura uko ubutonde n'amasaku bikora nk'amajwi shingiro					
Gusoma yubahiriza uburyo bwo gusoma					
Gukoresha utwatumye twungirije					
Gusoma ibihakane bigizwe n'inyuguti zirenze ebyiri mu mwandiko					
Gukoresha amagambo arimo ubutonde n'amasaku bikora nk'amajwi shingiro					

Kuvuga ibyitabwaho mu gusesengura imyandiko					
Kurondora ingingo z'umuco n'iz'amateka ziri mu mwandiko					
Gusesengura imyandiko					
Gutandukanya ingingo z'umuco n'iz'amateka ziri mu mwandiko					
Kurondora ingingo z'umwandiko					
Kurondora ibice by'imbata y'umwandiko					
Gutandukanya ingingo z'ingenzi n'iz'ingereka z'umwandiko					
Kugaragaza ibice by'imbata y'umwandiko					
Kurondora amabwiriza y'ihinamwandiko					
Kurondora intambwe z'ihinamwandiko					
Guhina umwandiko					
Kugaragaza intambwe z'ihinamwandiko					

Ikigwa cya 2.1: Ugusoma neza aranguruye yubahiriza utwatumuzo n'isesekaza



Ubushobozi fatizo: Gusoma neza aranguruye yubahiriza utwatumuzo n'isesekaza		
Ubumenyi	Ubumenyi ngiro	Ubukeshya
1. Kuvuga uburyo bwo gusoma	1. Gusoma yubahiriza uburyo bwo gusoma	1. Gushishikarira uburyo bwiza bwo gusoma
2. Kurondora amoko y'utwatumuzo twungirije	2. Gukoresha utwatumuzo twungirije	2. Kujora imikoreshereze y'utwatumuzo twungirije
3. Gutahura ibihakane bigizwe n'inyuguti	3. Gusoma ibihakane bigizwe n'inyuguti	3. Kwihatira kunoza imisomere y'

zirenze ebyiri mu mwandiko	zirenze ebyiri mu mwandiko	ibihekane bigizwe n'inyuguti zirenze ebyiri mu mwandiko
4. Gusobanura uko ubutinde n'amasaku bikora nk'amajwi shingiro	4. Gukoresha amagambo arimo ubutinde n'amasaku bikora nk'amajwi shingiro	4. Guharanira kutitiranya amagambo arimo ubutinde n'amasaku bikora nk'amajwi shingiro

 **Intangiriro: Ni ibiki nzi kuri iyi nyigisho, hanyuma ni ibihe nkeneye kumenya?**



Ikigwa cya 2.1 Umwitozo 1

Fatanya na mugenzi wawe mwegeranye musubize ibibazo bikurira.

1. Gusoma usesekaza bivuga iki?
2. Iyo bavuze utwatuzo twungirije wumva ari iki?
3. Utwatuzo twungirije dufata uwuhe mwanya mu nteruro?



Igikorwa cyo gutahura ibisubizo by'ikibazo



Ikigwa cya 2.1 Umwitozo 2

Soma umwandiko ukurikira hanyuma usubize ibibazo.

Kugenda bitera kubona!

Igitondo kimwe, abanyeshuri bo mu ishuri ryacu twari twabukereye twese. Iryo joro ntawari wigeze arushya agoheka kubera amatsiko abenshi twari tumaranye iminsi. Uko imbwa zamokaga nijoro ni ko nahitaga njya kureba ku isaha. Inyombya zavuze twarangije kwitegura. Bamwe ntibigeze bifuza no kunywa igikoma cyangwa icyayi, nyamara biyibagije ko barembywa n'urugendo rurerure. Erega maye muri Pariki y'Igihugu y'Akagera ni kure cyane uturutse mu Mujyi wa Kigali!

Ubwo twese tumaze kugera aho twagombaga guhurira, dusanga umushoferi yamaze kwitegura, imodoka idutwara iratswa ubundi turagenda. Muri urwo rugendo ibiganiro byinshi byerekezaga ku nyamaswa. Bamwe bati: “Turareba, ingwe, impyisi, inkwavu z’ishyamba... Ngewe ariko ubwo nari nifitiye n’ubwoba bw’uko zimwe muri izo nyamaswa zanshwanyaguza! Cyanecyane nk’imbogo, intare n’ingwe numvaga bavuga ko zitisukirwa. Urugendo ntirwatubereye rurerure nk’uko twabitekerezaga kubera ibiganiro binyuranye twagenda tunganira.

Ntibyatinze dusesekarayo, twakirwa n’ababyinnyi babukereye batubyinira imbyino z’umwimerere nyarwanda zishyushye rwose! Umuyobozi wo kuduherekeza muri pariki yari yaje kudusanganira mu rugendo kugira ngo atubere umusobanuzi, bituma tugendana ikizere. Ubwo ari na ko agenda adusobanurira iby’imiterere y’izo nyamaswa zituye ishyamba. Tumaze kuryinjiramo, yadusabye gutuza tukagenda twihera ijisho ibyo byiza bitatse ishyamba ari na ko tugenda turushaho gusobanurirwa ibyo kurengera ibidukikije. Twabonyemo b’ibiti n’ibyatsi bitandukanye birimo umucaca, umwishywa, n’ibindi.

Twiboneye inyamaswa nyinshi zirimo n’izo tutari tuzi cyangwa ngo tube twaraziboneye imbonankubone: indonyi, amasatura, imbogo, ibitera bijya gusa n’impundu, inzovu rwabunga, gasumbashyamba bakunda kwita twiga cyangwa jirafe... Uzi ko twabonye n’imvubu yinshi zoga mu biyaga byo muri Pariki y’Akagera! Twasobanukiwe ko inyamaswa z’indyabyatsi ari byo biryo by’inyamaswa z’indyanyama, zikaba ziza kuzihiga bwije. Akaba ari na yo mpamvu yatumye izo ndyanyama zirimo ingwe n’intare twaratashye tutazibonye. Twabonyemo n’inyoni zinyuranye zirimo kagoma yibereye mu bushorishori bw’igiti, imisambi yigendera hafi y’inkombe y’ikiyaga, izindi nyoni ziguruka mu kirere ndetse n’inkware bamwe muri twe batari barigeze guca iryera.

Nubwo twishyuye amafaranga, hakaba hari abakumva ko ari uguhombywa n’ubusa, nabamara impungenge mbabwira ko urugendo shuri ari ingirakamaro kandi ko umuntu yungukiramo byinshi. Ntitukemere kuryarywa rero ngo duheranwe n’ubujiji. Twiboneye byinshi bitangaje. Burya koko Abanyarwanda babivuze ukuri ngo: “Kugenda bitera kubona”! Burya koko u Rwanda rutatswe n’ibyiza!

Ibibazo:

1. Nimusome uyu mwandiko umwumwe muranguruye ijwi, igika ku gika mwakuranwa.
2. Nimukorere mu matsinda mato maze mutahure utwatuzo twakoreshejwe muri uyu mwandiko muvuge n’amazina yatwo.

3. Mu matsinda ya babiribabiri, nimwongere musome yu mwandiko mutahuremo amagambo yakoreshejwemo ibihekane bigizwe n'inyuguti zirenze ebyiri.
4. Tahura amagambo mu mwandiko y'impuzashusho (akoresha ubutinde n'amasaku nk'amajwi shingiro) maze uyasome wubahiriza uko yakoreshejwe mu mwandiko.

2.1 Ingingo z'ingenzi zo kwitabwaho

- Mu gusoma neza, usoma agomba kubahiriza utwatuzo n'isesekaza.
- Gusoma usesekaza bivuga bivuga gusoma ugaragaza amarangamutima yerekana neza uko ubutumwa bukubiye mu nteruro buteye. (Aho bibabaje ukababara, aho bishimishije ukishima, aho bitangaje ugatangara...)
- Amagambo y'impuzashusho akoresha ubutinde n'amasaku nk'amajwi shingiro: bivuze ko iyo muri ayo magambo amasaku cyangwa ubutinde bihindutse nay o ahita ahinduka andi magambo bitanasobanura kimwe.
- Urutonde rw'ibihekane birengeje inyuguti ebyiri: **nsh, nshy, nyw, (pfw), (pw), shw, shyw, tsw, nny, pfy, byw, myw, pfyw, (ryw), (vyw); mbw, (mfw), mpw, (mvw), ndw, ngw, njw, nk, (nshw), (nshyw), (nsw), ntw, nzw; mby, mpy, (mvy), nshy, ndy, njy, nsy, nty; (mbyw), (mvyw), njyw.**



Igikorwa cy' umwitozo wunganiwe



Ikigwa cya 2.1 Umwitozo 3

subiza ibibazo bikurikira.

1. Nimwongera musome uyu mwandiko umwumwe muranguruye ijwi, igika ku gika mwakuranwa. Mu gusoma mwubahirize utwatuzo n'isesekaza.
2. Itegereze interuro zikurikira utahure utwatuzo twungirije twakoreshejwemo n'aho dukoresheya.
 - a. Gusoma neza si ugusukiranya amagambo; gusoma neza ni no kumva ibyo usoma.
 - b. Burya habaho imirimo myinshi: guhinga, kubaka, kubaza n'ibindi.
 - Mariya ati: "Ibyo uvuze bingirirweho".
 - Mu Kinyarwanda baravugaga ngo: "Ifuni ibagara ubucuti ni akarengye".
 - c. Wari waragiye he?
 - Kwa Migabo.

- Semarinyota yansabye ko tuzajyana i Rukoma, ariko sinzamwemerera.
 - Ejo nzajya mu misa - sinzi niba wari uzi ko nsigaye njyayo - ntuzantegereze mbere ya saa sita.
- d.** Igikeri kirarikocora kiti: “Kuba mu bibuba si ko guhunika ibigega”.
- Nuko ya “nyamaswa” iravumbuka maze havamo umusore mwiza.
 - Ubwo “Inshyikanya ku mubiri ya rugema ahica” aba arahashinze.
- e.** Mu rugo rwa kinyarwanda habaga ibikoresho byinshi: ibibindi, ibyansi, ishoka, ibitebo, isekuru...
- Baragenda ngo bagere ku Ruyenzi bahahurira na mwene... simuvuze nzamuvumba!
- f.** Kigali, ku wa 15/10/2012.
- Koresha yego / oya mu gusubiza ibibazo
 - Itegeko N° 01/2010 ryo ku wa 29/01/2010 ikurikira.
- g.** Wakomerekejwe n’iki?
- Ntakibyara **nk’**intare n’ingwe.
 - Umubare **w’**amashuri **y’**imyuga uriyongera.
 - Nyereka uko batsa tereviziyo **n’**uko bayizimya.
 - Umwaka **w’**ibihumbi bibiri na cumi **n’**ibiri.

2.2 Ingingo z'ingenzi zo kwitabwaho

- Utwatuzo twungirije ni **utwatuzo bakoresha mu nteruro ariko tudafite agaciro gakomeye cyane nk'ak'utwatuzo tw'ibanze.**
- Mu twatuzo twungirije hari **udusoza interuro n'utujya hagati mu nteruro.**



Igikorwa cy' umukoro ngiro



Ikigwa cya 2.1 Umwitozo 4

Subiza ibibazo bikurikira wubahiriza amabwiriza yatanze kuri buri kibazo.

1. Ongerera usome ibika bibiri bya nyuma by'umwandiko “Kugenda bitera kubona!” wubahiriza utwatuzo n'isesekaza, hanyuma wandike amazina y'utwatuzo n'amazina arimo ibihokane birengere ingombajwi ebyiri wabonyemo.
2. Andika akandiko gato, ukoresheho utwatuzo tunyuranye nurangiza ugasomere mugenzi wawe mwicaranye wubahiriza utwatuzo n'isesekaza.
3. Shaka andi magambo abirabiri y'impuzashusho maze uyakoreshe mu nteruro zibonye.



Iby'ingenzi ngomba kwibuka:

- Umusomyi mwiza yubahiriza utwatuzo n'isesekaza.
- Mu gusoma ugomba kwirinda kwitiranya amagambo y'impuzashusho.




Isuzuma rinoza imyigire n'imyigishirize

Uyu mwanya wagenewe ibibazo byo gusuzuma uko wumvise inyigisho irangiye.

1. Soma igika cy'umwandiko urangura ijwi, wubahiriza utwatuzo n'isesekaza.
Umutoza azareba ko asoma neza wubahiriza utwatuzo n'isesekaza.
2. Andika interuro ebyiri kandi kandi buri yose ukoresheho nibura ibihokane bibiri bigizwe n'ingombajwi zirenze ebyiri, n'utwatuzo tutari muni ya tubiri.
Umutoza azareba ko buri mumutozwa yanditse interuro ebyiri zujuje ibyasabwe.

Ikigwa cya 2.2: Isesengura ry’umwandiko uko bikwiye ashingiye ku buryo bwo gusoma agamije gutahura amakuru akenewe.



Ubushobozi fatizo: Gusesengura umwandiko uko bikwiye ashingiye ku buryo bwo gusoma agamije gutahura amakuru akenewe

Ubumenyi	Ubumenyi ngiro	Ubukeshya
1. Kuvuga ibyitabwaho mu gusesengura imyandiko	1. Gusesengura imyandiko	1. Kugira umuco wo gusesengura no gutahura ubutumwa bukubiye mu mwandiko runaka
2. Kurondora ingingo z’umuco n’iz’amateka ziri mu mwandiko	2. Gutandukanya ingingo z’umuco n’iz’amateka ziri mu mwandiko	2. Gushishikarira kwita ku ngingo z’umuco n’iz’amateka ziri mu mwandiko

Intangiriro: Ni ibiki nzi kuri iyi nyigisho, hanyuma ni ibihe nkeneye kumenya?



Ikigwa cya 2.2 Umwitozo 1

Subiza ibibazo bikurikira bijyanye n'iyi nyigisho tugiye kwiga:

1. Utekereza ko ari iyihe mpamvu ituma dusoma umwandiko?
2. Iyo dusesengura umwandiko dushobora kubonamo nk'izihe ngingo?



Igikorwa cy' ugutahura ibisubizo by'ikibazo



Ikigwa cya 2.2 Umwitozo 2

Soma uyu mwandiko nurangiza usubize ibibazo biwukurikiye.

Twuzuzanye tunozza umurimo

Nyiraneza avukana n'abavandimwe batatu ari bo Mukamurigo, Nubahimana na Mugisha. Iyo baganiriye n'ababyeyi babo bababwira ko mu gihe cyabo abakobwa batahabwaga amahirwe yo kwiga nka basaza babo b'abahungu. Ngo ababyeyi benshi bavugaga ko umukobwa agomba kuguma mu rugo agateka, akoza barumuna be na basaza be bato kuri we kandi akabaheka. Igihe cyagera iwabo bakamushyingira uwo bashatse atagize n'uruhare mu kumukunda cyangwa kumuhitamo, ubwo impamyabumenyi ye ikaba ari iyo. Ngo ni ko umuco n'amateka byari biteye. Ngo nta n'ijambo bahabwaga kera kandi kuko bavugaga ko "nta nkokokazi ibika isake ihari", "uruvuze umugore ruvuga umuhoro n'indi migani myinshi nk'iyiyo.

Mu rugo kwa Nyiraneza borora inka n'ihene kandi bikabafasha kwiteza imbere. Aya matungo mbere bayahuraga mu gasozi akagenda yangiza ibidukikije ari na ko anyanyagiza ifumbire ku gasozi. Abahungu bonyine bakaba ari bo bajya ibihe byo kuyaragira naho abakobwa bakajya ibihe byo gukubura, guteka no koza amasahani. Igihe cyarageze bitabira gahunda yo kororera amatungo mu kiraro.

Basobanukiwe kandi ihame ry'uburinganire n'ubwuzuzanye maze biyemeza kuryubahiriza. Iyo urebye usanga kuri ubu Nyiraneza akunda gukora isuku yo mu rugo cyanecyane iyo Mukamurigo yajyanye na basaza be kwahirira amatungo. Iyo bavuye kwahira, bafasha Nyiraneza imirimo yo mu rugo hatitawe ku kuvuga ngo hari imirimo igenewe igitsina iki n'iki. Igitera aba bavandimwe akanyamuneza ni uko usanga imirimo yose ikorwa neza mu bwuzuzanye kandi n'amasomo yo ku ishuri bakayakurikirana batarangaye.

Igitondo kimwe inyana ntoya yaramennye, iva mu ruhongore yirukanka mu myaka ari na ko yangiza ibidukikije. Bayigaruye iranga, nuko biyungura inama yo kuyikurura ariko yanga kuza. Babonye ibananiye, birinda kuyikubita ndetse

no kuyikurubana kugira ngo itava aho ivunika cyangwa ikangirika ku bundi buryo. Nuko bose bafatanyaga kuyagaza, imaze gutuza iremera barayiterura maze bayisubiza mu ruhongore. Nyiraneza na Mukamurigo barabafasha kandi bashimishwa no kubona na bo bagira uruhare mu gukora umurimo ukomeye nk'uko basaza babo. Ibyo byahuriranye n'uko bari bakiri mu rugo bitegura kujya ku ishuri, babikora vuba barangije bitabira ishuri badakererewe.

Mu gihe bavuye ku ishuri, bongeye kuganira n'ababyeyi babo bababwirako ku ishuri babaganirije ku gukunda umurimo no kuwunozza. Dore inshamake y'icyo kiganiro: Umurimo wose ukoze mu buryo bunze kandi utanga umusaruro ugira uruhare rukomeye mu iterambere ry'umuryango n'iryo igihugu muri rusange. Mu mibereho ya muntu ni byiza ko buri wese agira umurimo ashize imbere kandi agaharanira ko waguka, bityo inyungu ziwuvuyemo zikamufasha kugira ubuzima bwiza, cyane cyane iyo awukorana umwete aharanira no kuwushyira imbere kugira ngo agere ku ntego yiyemeje.

Abahinzi bese bashimishwa no guterera imbuto zabo igihe no kuzitaho uko bikwiye kugira ngo umusaruro ube mwiza, mu gihe abubatsi banezwe na kubona inyubako yuzuye kandi ikomeye nk'uko babyifunga maze ikazaramba mu mikoreshereze yayo. Abadozi bagira umutima utuje iyo ababagana babonye ko babadodeye neza kandi mu gihe bumvikanyeho. Kimwe n'abigisha na bo iyo abigishwa bakurikiye neza amasomo bahabwa byose bigenda neza. Ni byiza gukorana umwete n'urugwiro umurimo wose kuko igihugu gitezwe imbere n'amaboko y'abagituye.

Ibibazo:

1. Inyunguramagambo

Sobanura amagambo akurikira ukuriye igisobnuro cyo mu mwandiko.

- a. Uburinganire
- b. Ubwuzuzanye
- c. Yaramennye
- d. Uruhongore
- e. Amaboko

2. Ibibazo byo kumva no gusesengura umwandiko

- a. Rondora abantu bavugwa muri uyu mwandiko.
- b. Erekanako insanganyamatsiko zivugwa muri uyu mwandiko.
- c. Mu matsinda yubahiriza uburinganire n'ubwuzuzanye, nimwerekane ingingo z'umuco n'iz'amateka zigaragara muri uyu mwandiko.
- d. Tanga ingero ebyiri z'imirimo yavuzwe mu mwandiko ugaragaze n'uko yanzwe.

2.3 Ingingo z'ingenzi zo kwitabwaho

- Kwita ku ihame ry'uburinganire n'ubwuzuzanye
- Kurengera ibidukikije
- Gukunda umurimo no kuwunoza
- Gutahura mu mwandiko ingingo z'umuco n'iz'amateka



Igikorwa cy' umwitozo wunganiwe



Ikigwa cya 2.2 Umwitozo 3

Ongera usome umwandiko “Twuzuzanye tunoza umurimo” maze usubize ibibazo.

1. Koresha buri jambo muri aya twasobanuye mu nteruro iboneye.
 - a. Uburinganire
 - b. Ubwuzuzanye
 - c. Yaramennye
 - d. Uruhongore
 - e. Amaboko
2. Nimukorere mu matsinda maze mujore uyu mwandiko mugaragaza ibyo mwashimye n'ibyo mwanenze mu bivugwamo.
3. Sobanura iyi mvugo “igihugu cyubakwa n'amaboko y'abagituye”.



Igikorwa cy' umukoro ngiro



Ikigwa cya 2.2 Umwitozo 4

Ugendeye ku mwandiko “Twuzuzanye tunoza umurimo” subiza ibibazo bikurikira:

1. Gereranya ibivugwa muri uyu mwandiko ku burunganire n'ubwuzuzanye ndetse no kurengera ibidukikije mu gihe cya kera no mu gihe cy'ubu.
2. Ugendeye ku bijyanye no gukunda umurimo no kuwunoza twabonye mu mwandiko, wagaragaza ute uko ukwiye kunoza umurimo wawe?



Iby'ingenzi ngomba kwibuka:

- Kwita ku ihame ry'uburinganire n'ubwuzuzanye
- Kurengera ibidukikije
- Gukunda umurimo no kuwunoza




Isuzuma rinoza imyigire n'imyigishirize

Uyu mwanya wagenewe ibibazo byo gusuzuma uko wumvise inyigisho irangiye.

1. Tanga ingero zo kwita ku bidukikije zavuzwe mu mwandiko "Twuzuzanye tunoza umurimo"
2. Sobanura uko twakwita ku ihame ry'uburinganire n'ubwuzuzanye
3. Erekanne ingingo z'umuco n'iz'amateka zigaragara mwandiko "Twuzuzanye tunoza umurimo".

Ikigwa cya 2.3: Ukugaragaza neza ingingo z'ingenzi z'umwandiko agendeye ku bika biwugize.



Ubushobozi fatizo: Kugaragaza neza ingingo z'ingenzi z'umwandiko agendeye ku bika biwugize

Ubumenyi	Ubumenyi ngiro	Ubukeshya
1. Kurondora ingingo z'umwandiko	1. Gutandukanya ingingo z'ingenzi n'iz'ingereka z'umwandiko	1. Gushishikarira kugendera ku ngingo z'ingenzi z'umwandiko
2. Kurondora ibice by'imbata y'umwandiko	2. Kugaragaza ibice by'imbata y'umwandiko	2. Guharanira guhanga umwandiko ukurikije imbata yawo



Intangiriro: Ni ibiki nzi kuri iyi nyigisho, hanyuma ni ibihe nkeneye kumenya?



Ikigwa cya 2.3 Umwitozo 1

Subiza ibibazo bikurikira:

1. Utekereza ko umwandiko wanditse neza wagombye kuba ufite imbata iteye ite? (ugizwe n'ibihe bice?)
2. Mu gihimba cy'umwandiko ibitekerezo bisobanurwa bite?



Igikorwa cy' ugutahura ibisubizo by'ikibazo



Ikigwa cya 2.3 Umwitozo 2

Soma uyu mwandiko maze usubize ibibazo biwukurikiye.

Uburinganire n'ubwuzuzanye bw'ibitsina byombi

Igihugu cyacu kiri mu bihugu bya mbere ku isi biharanira guteza imbere ihame ry'uburinganire n'ubwuzuzanye ku bantu b'ibitsina byombi. Uburinganire n'ubwuzuzanye bugaragarira mu muryango, mu buyobozi, mu burezi, mu gucunga umutekano, mu gutwara ibinyabiziga, mu izungura n'ibindi. Reka tubirebe mu buryo burambuye.

Mu muryango, usanga imirimo yo mu rugo ikorwa mu buryo bwo kuzuzanya hagati y'umugabo n'umugore. Umugore afite ijamba ku mutungo w'urugo, ibitekerezo n'uruhare bye bifasha kunganirana mu byagirira umuryango akamaro. Abana b'abahungu n'abakobwa bakora imirimo batavanguye iyagenewe buri gitsina nk'uko kera byahoze. Ubu usanga imirimo ikorwa mu buryo bwo kureba icyateza imbere umuryango, icyakora iyo hajemo ibisaba ingufu nyinshi abahungu bashobora kunganira bashiki babo mu kuyinoza.

Mu buyobozi, bigaragara ko inzego z'ubuyobozi zirimo abagabo n'abagore ku buryo buzuzanya mu mirimo yose. Iyo urebye inzego zifata ibyemezo usanga abagore batazihejwemo kuko babasha no kuyobora minisiteri, intara, uturere n'izindi nzego zitandukanye kandi bakabikora neza nk'ababifitiye ubumenyi n'ubushobozi.

Mu burezi, hari impinduka zikomeye cyane zakozwe kuko ubu abana bose bahabwa amahirwe yo kwiga amasomo yose n'imyuga itandukanye. Mu nzego z'uburezi usanga abantu bose, abagore n'abagabo bisangamo. Ibitekerezo byabo n'uruhare byabo mu guteza imbere uburezi ni ntagereranywa. Aha ndetse usanga no mu nzego zifata ibyemezo hagaragaramo ihame ry'uburinganire n'ubwuzuzanye.

Mu gucunga umutekano, hari abagore benshi bakora umwuga wa giporisi, uwa gisirikari n'iyindi kandi bakayikora neza bafatanyije n'abagabo bayirimo. Uburinganire butuma iyi mirimo ijyanye n'umutekano ikorwa mu buryo bunoze bigatuma Igihugu kirushaho gutekana.

Mu rwego rwo gutwara ibinyabiziga, abagore muri rusange na bo bakangukiye gukorera impushya zo gutwara ibinyabiziga kandi ugasanga banabitwarana ubwitonzi n'ubuhanga kimwe n'abagabo bagenzi babo. Ndetse no mu mirimo ijyanye no gutwara ibinyabiziga bigenewe gutwara abantu benshi abagore na ho ntibatanzwe!

Mu izungura, hambere byari bigoye ko abagore bazungura imitungo y'iwabo kuko nta burunganire bwari buhari muri icyo gihe. Agaciro kahabwaga abagabo gusa. Bitewe n'impinduka zagaragaye, abagore na bo barazungura, bahabwa umunani kimwe na basaza babo.

Muri rusange ihame ry'uburinganire n'ubwuzuzanye rirubahirizwa mu Rwanda. Abantu b'ibitsina byombi bahabwa amahirwe angana mu bikorwa byose bigamije guteza imbere Igihugu. Ibi bigashigikirwa cyanecyane mu nzego zifatirwamo ibyemezo.

Ibibazo ku mwandiko:

1. Inyunguramagambo

i. Sobanura amagambo akurikira ukurikije inyito afite mu mwandiko:

- a. Ntagereranywa
- b. Ntibatanzwe
- c. Izungura
- d. Umunani

ii. Koresha buri jambo muri ayo amaze gusobanurwa mu nteruro iboneye.

2. Subiza ibibazo bikurikira:

- a. Uyu mwandiko uvuga ku yihe nsanganyamatsiko?
- b. Erekana ingingo z'ingenzi zigaragajwe muri uyu mwandiko.
- c. Sobanura imiterere y'imbata y'uyu mwandiko.



Igikorwa cy' umwitozo wunganiwe



Ikigwa cya 2.3 Umwitozo 3

Ongera usome umwandiko "Uburinganire n'ubwuzuzanye bw'ibitsina byombi" maze usubize ibi bibazo:

1. Ibika by'uyu mwandiko biteye bite ukurikije ibivugwamo?

2. Erekena ingingo z'ingenzi kuri buri gika mu bigize igihimba cy'uyu mwandiko (urahera ku gika cya kabiri):
3. Garagaza zimwe mu ngingo z'ingereka ziherekeza/zisobanura buri ngingo y'ingenzi

2.4 Ingingo z'ingenzi zo kwitabwaho

- Imbata y'umwandiko igizwe n'ibice bine: umutwe, intangiriro, igihimba n'umusozo.
- Igice k'igihimba gishobora kugirwa n'ibika byinshi, buri gika kigasobanurwamo ingingo y'ingenzi.



Igikorwa cy' umukoro ngiro



Ikigwa cya 2.3 Umwitozo 4

Subiza ibibazo bikurikira:

1. Ni ibihe bintu izajya ukurikiza igihe uhanga umwandiko?
2. Mu ihangamwandiko ingingo y'ingenzi ni iki?
3. Ingingo z'ingereka ni iki?



Iby'ingenzi ngomba kwibuka:

- Imbata y'umwandiko igizwe n'ibice bine: umutwe, intangiriro, igihimba n'umusozo.
- Igice k'igihimba gishobora kugirwa n'ibika byinshi, buri gika kigasobanurwamo ingingo y'ingenzi.




Isuzuma rinoza imyigire n'imyigishirize

Uyu mwanya wagenewe ibibazo byo gusuzuma uko wumvise inyigisho irangiye.

1. Erekena ingingo z'ingenzi zagaragajwe muri uyu mwandiko
2. Sobanura imiterere y'imbata y'uyu mwandiko
2. Ingingo z'ingereka ni iki?
4. Ni akahe kamaro ko kwandika wubahiriza ibice by'umwandiko?

Ikigwa cya 2.4: Ihina ry’umwandiko akurikiranya neza ibitekerezo ashingiye ku ngingo z’ingenzi.



Ubushobozi fatizo: Guhina umwandiko akurikiranyaneza ashingiye ku ngingo z’ingenzi

Ubumenye	Ubumenyi ngiro	Ubukeshya
1. Kuronndora amabwiriza y’ihinamwandiko	1. Guhina umwandiko	1. Kurangwa no gutanga ubutumwa bw’umwandiko mu mpine
2. Kurondora intambwe z’ihinamwandiko	2. Kugaragaza intambwe z’ihinamwandiko	2. Gushishikarira kwita ku rukurikirane rw’intambwe z’ihangamwandiko

 **Intangiriro: Ni ibiki nzi kuri iyi nyigisho, hanyuma ni ibihe nkeneye kumenya?**



Ikigwa cya 2.4 Umwitozo 1

Subiza ikibazo gikurikira: Ni iki wakwitaho mu guhina umwandiko?



Igikorwa cy' ugutahura ibisubizo by'ikibazo



Ikigwa cya 2.4 Umwitozo 2

Soma umwandiko ukurikira usubize ibibazo byawubajijweho.

Umurimo unozze uhisha nyirawo agaciro

Umunsi umwe, isega n'umuhari byarimo biganira biza kuvuga ku muntu. Umuhari ubwira isega uti: "Burya uko ubona umuntu agira intege cyane, nta nyamaswa yapfa kumuhangara." Isega na yo iti: "Aho uribeshya cyane rwose! Uzaze tugende unyereke umuntu urebe ko ntahita munesha!" Bihana umunsi maze byombi bizindukira ku nzira aho abantu benshi bakundaga kunyura bagiye mu mirimo yabo. Maze byikinga iruhande rw'igihuru.

Muri ako kanya hanyura umwana wihitiraga, nuko isega ibaza umuhari iti: "Uriya ni we muntu"? Umuhari uti: "Oya, uriya ntaraba umuntu, azaba we kera".

Haciye akandi kanya hahinguka umusaza. Isega yongera kubaza umuhari iti: "Uriya ni we muntu"? Umuhari urayisubiza uti: " Oya, uriya yari we kera, ubu ntakiri we". Nuko bikomeza gutegereza.

Mu mwanya utarambiranye noneho haza umusirikari witoje umwuga we neza, wari ugiye ku rugamba yitwaje n'ibikoresho bye by'akazi. Umuhari ukimuka iryera ubwira ya sega uti: "Noneho ndabona umuntu aje, ngaho genda muhangane, nge mbaye nisubiriye ku mwobo wange".

Nuko isega iba isatiriye wa musirikari. Igiye kumwegera yenda imbunda yari yitwaje ayirasa mu maso, ariko yihagararaho ikomeza kumusatira. Igize ngo iramwegera, wa musirikari yikura inkota ye ayitemagura umubiri wose maze irahunga, ariko igenda ivirirana umubiri wose. Umusirikari amaze kuyinesha, yikomereza urugendo rwe.

Hanyuma isega ngo ihinguke aho umuhari wari wagiye kwihisha, uyikubise amaso urayibaza uyinyega uti: "Mbe mwana wa da, aho ntiwanesheje wa muntu"! Isega na yo iti: "Ihorere, urwo mpuye na rwo ni agahomamunwa! Nagize ngo ndamwegera, yenda inkoni yari yitwaje ayihagamo umwuka, ayinturikiriza ku mazuru, numva habaye nk'aho bateye amabuye! Ngize ngo

ndihangana nkomeza kumusatira, yikura urubavu rumwe aruntemaguza umubiri wose, mbese si nge ubonye uko mwikura nuko nza niruka"! Uhereye ubwo, isega ntiyongera kwirarira ko yanesha umuntu.

1. Inyunguramagambo

i. Sobanura amagambo akurikira ukurikije inyito afite mu mwandiko:

- a. Isega
- b. Umuhari
- c. Gusumira
- d. Intege

ii. Subiza ibibazo bikurikira:

- a. Ni abahe banyarubuga (abakinankuru) b'uyu mwandiko?
- b. Muri bose ni uwuhe ugaragaza kunoza umurimo ashinzwe? Sobanura impamvu.
- c. Musomere mu matsinda mutahure amagambo ahuza ibika by'uyu mwandiko
- d. Ugiye guhina uyu mwandiko wakwita ku biki?

2.5 Ingingo z'ingenzi zo kwitabwaho

- Uhina umwandiko akurikiranya ibitekerezo ashingiye ku ingingo z'ingenzi.



Igikorwa cy' umwitozo wunganiwe



Ikigwa cya 2.4 Umwitozo 3

Subiza ibibazo bikurikira ugendeye ku mwandiko twasomye:

1. Mukorere mu matsinda mutahure imbata y'umwandiko
2. Tahura (umwumwe) ingingo z'ingenzi n'iz'ingereka zikubiye muri buri gika.

2.6 Ingingo z'ingenzi zo kwitabwaho

- Ingero z'amagambo ahuza ibika mu mwandiko
 - **Ku gika k'intangiriro ushobora gukoresha:**
Iyo urebye, Muri iyi minsi, Bivugwa ko...
 - **Ku bika by'igihimba ushobora gukoresha:**
Mu by'ukuri, Muri ako kanya, Hagiye akandi kanya, Mu mwanya utarambiranye, Noneho, Nuko, Byongeye, Nyamara, Ku ruhande rumwe, Ku rundi ruhande...
 - **Ku gika cy'umusozo(umwanzuro) ushobora gukoresha:**



Igikorwa cy' umukoro ngiro



Ikigwa cya 2.4 Umwitozo 4

Ongera usome umwandiko “Umurimo unoze uheshya nyirawo agaciro” maze usubize ibibazo bikurikira:

1. Sobanura amagambo akurikira ukurikije inyito afite mu mwandiko unakoreshe buri ryose mu nteruro iboneye.
 - a. Kunesha
 - b. Agahomamunwa
 - c. Kunnyega umuntu
2. Buri wese ku giti ke, agendeye ku ngingo z'ingenzi z'umwandiko mwabonye mu mwitozo uheruka nakore inshamake y'umwandiko maze ayandike.



Iby'ingenzi ngomba kwibuka:

Ihinamwandiko rishingira ku ngingo z'ingenzi z'umwandiko uhinwa.



Isuzuma rinoza imyigire n'imyigishirize

Uyu mwanya wagenewe ibibazo byo gusuzuma uko wumvise inyigisho irangiye.

1. Sobanura amagambo akurikira:
 - a. Guca iryera
 - b. Aho ntiwanesheje wa muntu
2. Tahura (umwumwe) ingingo z'ingenzi zikubiye muri buri gika.
3. Tanga ingero 3 z'amagambo ahuza ibika mu mwandiko

Ku gika k'intangiriro ushobora gukoresha:

.....

Ku bika by'igihimba ushobora gukoresha:

.....

Ku gika cy'umusozo (umwanzuro) ushobora gukoresha:

.....

1. Uzuza imbonerahamwe ikurikira.

Nkuko byavuzwe ku ntangiriro yiyi mbumbe, nta buryo buri bwo cyangwa ubutari bwo bwo gusubiza iki kibazo; ahubwo ni ibigufasha wowe ubwawe muri iyi nyigisho. Tekereza wowe ubwawe. Niba nyuma yo kwiga iyi mbumbe irangiye, ibi noneho washoboye kubikora n'ikigero ubishoboyeho. Soma ibibanza mu kazu ko hejuru hanyuma ushyire akamenyetso aho ubona hajyanye n'ikigero cy'uko ubyumva.

Inararibonye ryange	Nta kintu na kimwe nzi ku mikoreshereze yabyo.	Nziho bike.	Nziho ibiringaniye.	Nziho byinshi.	Ndiyizeye ku mikoreshereze yabyo.
Ubumenyi, ubumenyi ngiro n'ubukesho					
Kuvuga uburyo bwo gusoma					
Kurondora amoko y'utwatumye twungirije					
Gutahura ibihemba bigizwe n'inyuguti zirenze ebyiri mu mwandiko					
Gusobanura uko ubutonde n'amasaku bikora nk'amajwi shingiro					
Gusoma yubahiriza uburyo bwo gusoma					
Gukoresha utwatumye twungirije					
Gusoma ibihemba bigizwe n'inyuguti zirenze ebyiri mu mwandiko					
Gukoresha amagambo arimo ubutonde n'amasaku bikora nk'amajwi shingiro					
Kuvuga ibyitabwaho mu gusesengura imyandiko					
Kurondora ingingo z'umuco n'iz'amateka ziri mu mwandiko					

Gusesengura imyandiko					
Gutandukanya ingingo z'umuco n'iz'amateka ziri mu mwandiko					
Kurondora ingingo z'umwandiko					
Kurondora ibice by'imbata y'umwandiko					
Gutandukanya ingingo z'ingenzi n'iz'ingereka z'umwandiko					
Kugaragaza ibice by'imbata y'umwandiko					
Kurondora amabwiriza y'ihinamwandiko					
Kurondora intambwe z'ihinamwandiko					
Guhina umwandiko					
Kugaragaza intambwe z'ihinamwandiko					

2. Uzuza iyi mbonerahamwe kandi wibuke kwereka umutoza ibyo wujemo.

Ibyakozwe neza	Ibikeneye kongerwamo imbaraga	Ibikorwa byakwifashishwa mu kongera imbaraga aho bikenewe
1.	1.	1.
2.	2.	2.

Imbumbe ya 3: Ihanga n'itegura by'imyandiko n'inyandiko

Ibyigwa

- 3.1** Ihimba n'iyandika by'imyandiko mu buryo bunoze ku nsanganyamatsiko zitandukanye yubahiriza amategako y'imyandikire, imyubakire y'interuro n'imiterere iboneye y'imyandiko.
- 3.2** Itegura ry'inyandiko zinyuranye kandi zinoze zifitanye isano n'akazi yubahiriza amabwiriza y'imyandikire y'lkinyarwanda n'imiterere y'inyandiko asabwa.

Inshamake y'imbumbe ya 3:

Muri iyi mbumbe dusangamo inyigisho yo guhimba no kwandika imyandiko mu buryo bunoze ku nsanganyamatsiko zitandukanye hubahirizwa amategako y'imyandikire, imyubakire y'interuro n'imiterere iboneye y'imyandiko. Ari ho dusanga umwandiko ntekerezo, mbarankuru, mvugamitere, ikinamico n'umuvugo n'uturango twayo. Intambwe zikurikizwa mu ihangamwandiko ntekerezo, Imbata yawo. Harimo kandi amwe mu mabwiriza y'imyandikire y'lkinyarwanda n'iyiganteruro rivuga ku nteruro y'inyabumwe n'interuro y'urusobe.

Hrimo nanone gutegura inyandiko zinyuranye kandi zinoze zifitanye isano n'akazi hubahirizwa amabwiriza y'imyandikire y'lkinyarwanda n'imiterere y'inyandiko asabwa. Aho tubonamo amabaruwa (isanzwe n'iy'ubuyobozi), raporo y'inama, urutonde rw'ibikoresho, amatangazo n'ubutumwa bugufi.




Gusuzuma ubushobozi umutozwa afite ku nyigisho igiye kwigwa: Imbumbwe ya 3

1. Itegereze ishusho. Urabonaho iki? Ibyo ubonaho urabona biganisha ku ki? Utekereza ko muri iyi mbumbwe twigamo iki?
2. Uzuza imbonerahamwe ikurikira.

Nta buryo buri bwo cyangwa ubutari bwo bwo gusubiza iki kibazo; ahubwo ni ibigufasha wowe ubwawe muri iyi nyigisho. Tekereza wowe ubwawe. Niba ibi ushoboye kubikora n'ikigero ubishoboyeho. Soma ibibanza mu kazu ko hejuru hanyuma ushyire akamenyetso aho ubona hajyanye n'ikigero cy'uko ubyumva.

Inararibonye ryange	Nta kintu na kimwe nzi ku mikoreshereze yabyo.	Nziho bike.	Nziho ibiringaniye.	Nziho byinshi.	Ndiyizeye ku mikoreshereze yabyo.
Ubumenyi, ubumenyi ngiro n'ubukesha					
Guhimba no kwandika imyandiko mu buryo bunoze ku nsanganyamatsiko zitandukanye yubahiriza amategeko y'imyandikire, imyubakire y'interuro n'imiterere iboneye y'imyandiko.					
Gutegura inyandiko zinyuranye kandi zinoze zifitanye isano n'akazi yubahiriza amabwiriza y'imyandikire y'Ikinyarwanda n'imiterere y'inyandiko asabwa					

Ikigwa cya 3.1: Ihimba n'iyandika by'imyandiko mu buryo bunoze ku nsanganyamatsiko zitandukanye yubahiriza amategeko y'imyandikire, imyubakire y'interuro n'imiterere iboneye y'imyandiko.



Ubushobozi fatizo: Guhimba no kwandika imyandiko mu buryo bunoze ku nsanganyamatsiko zitandukanye yubahiriza amategeko y'imyandikire, imyubakire y'interuro n'imiterere iboneye y'imyandiko.

Ubumenyi	Ubumenyi ngiro	Ubukeshya
1. Kurondora amoko y'imyandiko	1. Gutandukanya amoko y'imyandiko	1. Gushishikarira kwita ku turango twa buri mwandiko
2. Kurondora ibice by'umwandiko ntekerezo	2. Kugaragaza imbata y'umwandiko ntekerezo	2. Kurangwa no kwandika ibitekerezo mu buryo bw'ihanagamwandiko
3. Kuvuga amategeko y'imyandikire	3. Kwandika yubahiriza amategeko y'imyandikire	3. Kujora imyandikire y'ahakoreshwa inyuguti nkuru, amagambo afatana

mikoreshereze y'inyuguti nkuru, amagambo afatana n'adafatana, ikata n'itakara ry'inyajwi n'amazina bwite	mikoreshereze y'inyuguti nkuru, amagambo afatana n'adafatana, ikata n'itakara ry'inyajwi n'amazina bwite	n'adafatana, ikata n'itakara ry'inyajwi n'amazina bwite
4. Kuvuga amoko y'interuro ukurikije ibice biyigize	4. Gutandukanya amoko y'interuro ukurikije ibice biyigize	4. Gushishikarira gukoresha interuro hitawe ku myubakire yayo.

 **Intangiriro: Ni ibiki nzi kuri iyi nyigisho, hanyuma ni ibihe nkeneye kumenya?**



Ikigwa cya 3.1 Umwitozo 1

Subiza ibibazo bikurikira:

1. Tanga ingero z'amoko y'imyandiko uzi.
2. Kosora izi nteruro ukurikije amabwiriza y'imyandikire:
Mukasine na mutima bavuye ikigali bagenda buhoro buhoro munzira bahuye nimodoka imeze nka iya rukundo.
3. Ukurikije ibice by'interuro, interuro zirimo ayahe moko?



Igikorwa cyo gutahura ibisubizo by'ikibazo



Ikigwa cya 3.1 Umwitozo 2

Subiza ibibazo bikurikira:

1. Musomere mu matsinda buri mwandiko muri iyi ikurikira hanyuma mugaragaze ibiyiranga (imiterere yayo).

Umwandiko ntekerezo

Twite ku buzima

Ubuzima ni ikintu giharanirwa na buri wese. Ni ngombwa kwita ku buzima mu buryo bw'imitekerereze, imyitwarire, imyifatire ndetse n'imikorere. Ese ibyo umuntu yakora iki ngo abigereho?

Guha umwanya ibitekerezo bifasha kubishyira ku murongo no guhitamo igikwiye kuyobora umuntu bitewe n'intego afite yo kugira ubuzima bwiza. Uburyo umuntu yitwara n'uko yifata mu migenzereze ye ya buri muni bimutegeka kwitwararika ngo yirinde icyamwangiriza ubuzima. Ni ngombwa kwirinda ibiyobyabwenge kuko byangiza ubuzima. Iyo umuntu akora imirimo

imurusha ingufu nko guterura ibiremereye cyane no gukora ubutaruhuka binaniza umubiri ndetse bikaba byamuviramo uburwayi. Gukora imirimo ngororamubiri bituma ubuzima bugenda neza, umuntu akirinda indwara zimwe na zimwe ziterwa no kutiyitaho. Indyo yuzuye ya buri muni ni ngombwa ku bantu bose, abato n'abakuru.

Ubuzima buzira umuze buraharanirwa, nk'uko bivugwa ngo: "Amagara araseseka ntayorwa". Buri wese akwiye kugenzura imyitwarire, imitekerereze n'imigirire ye ya buri muni kugira ngo abashe kurama.

Ibiranga umwandiko ntekerezo

.....
.....

Umwandiko mbarankuru

Seruka ni umusaza utuye ku musozi wa Gikuyu. Umunsi umwe yifuje gusobanukirwa n'uburyo uburezi mu Rwanda bugenda bushyirwamo imbaraga. Byaramuzinduye, afata urugendo ageze kuri Minisiteri ifite uburezi mu nshingano zayo burezi yakiriwe n'ababishinzwe bamwereka ingamba zafashwe zo kuzamura ireme ry'uburezi no kwagura ibikorwa remezo bifasha abanyeshuri kwiga bisanzuye. Amaze kumva uko uburezi bushyigikiwe kandi bukurikiranywe neza, yahise asezerana ibyishimo yihutira gutahana iyo nkuru nziza ngo ayigeze kuri bagenzi be.

Ageze iwe abamuganaga bose yabasobanuriraga ingamba nziza zo guteza imbere uburezi. Yashishikariye abakiri bato guha agaciro inyigisho bahabwa n'abarezi babo. Abakuru batabonye ayo mahirwe yabakanguriye kugana amasomero abafasha guhabwa inyigisho zibagenewe.

Ibiranga umwandiko mbarankuru

.....
.....

Umwandiko mvugamiterere/mvugo shusho

Umwari w'u Rwanda

Umwari w'u Rwanda arangwa no kwimakaza umuco, agashyira imbere indangagaciro zikwiye Umunyarwandakazi, mbese ugasanga ari nyampinga koko! Yitabira umurimo akurikije amasomo yahawe n'abarezi batandukanye bamuhaye uburere, ubumenyi n'ubushobozi. Ntiyiganda ku murimo uwo ari wo wose ugenewe kumufasha kuvugurura imibereho ye. Kugira umwete biramuranga kandi agakorana ubuhanga mu byo ashinzwe gukurikirana.

Bitewe n'umwuga yahisemo gukora yita ku iterambere ry'umuryango, ibi byose akabikora yitegura kuba mutima w'urugo azashinga kuko burya uruhare rwe ari ntagereranywa. Umwari ukwiye ni urugero rwiza mu kwimakaza isuku, akaba ipfundo ry'umuryango usakayemo ubwuzu n'ituze.

Ibiranga umwandiko mvugamiterere/mvugo shusho:

.....
.....

Ikinamico: Ubwenge burarahurwa!

Umwinjizo:

Muri iyi kinamico **“Ubwenge burarahurwa!”** murasangamo abanyeshuri bari baragize imbogamizi zo kudakomeza amashuri yisumbuye y'uburezi rusange. Rimwe baza guhurira ku isoko, baganiriye bungurana inama yo gukomeza amashuri yabo mu mashuri y'imyuga. Bihurirana n'uko mu gace k'iwabo hari hamaze iminsi hatangiye ishuri ryigisha imyuga.

Abakinnyi:

Murisa: umunyeshuri w'umuhungu warangije ikicro rusange cy'amashuri yisumbuye (umwaka wa 3)

Kamariza: umunyeshuri w'umukobwa warangije amashuri abanza (umwaka wa 6)

Mutabazi: umunyeshuri w'umuhungu warangije umwaka wa kabiri w'amashuri yisumbuye (umwaka wa 2)

Kanyange: umunyeshuri w'umukobwa warangije umwaka wa mbere w'amashuri yisumbuye (umwaka wa 1)

Nimukurikire umukino.

Agakino ka mbere

Aka gakino karakinirwa ku isoko, Mutabazi, Kanyange, Murisa na Kamariza baremye isoko bisanzwe.

Mutabazi: (*atangara*). Eee, ariko isoko ni ryiza riraduhuje ni ukuri! Muraho ba Murisa, Kamariza na Kanyange?

Kanyange: (*amwenyura*). Muraho neza!

Mutabazi: Ese ko mbona mufite ibitebo birimo ubusa mwari mwazanye iki ku isoko ko nge imyumbati nazanye nabuze abaguzi?

Kanyange: Nge iwacu bari bantumye kugurisha ibijumba gusa nsanze byarumbutse bampaye make sha! 500f yonyine!

Murisa: (abwira Kanyange). Wowe se disi ukeneye amafaranga y’iki wakwisubiriye kwiga ko Leta yaborohereje. Numvise ko ababyariye iwabo nkawe babemerera kwiga imyuga ku buntu. Cyokora nge ndaza gusaba iwacu bazandihire pe! Navuye mu ishuri none ndicuza impamvu, ariko mbonye uburyo najya kwiga gusidira.

Kanyange: Mbe Muri, wagize ngo namenye ayo mahirwe? Ese we, mwaretse tugahita dupanga twese tugahurira muri ririya shuri ry’imyuga tukirwanaho. Si byo Kamariza we?

Kamariza: (abanze yiyumvire). Ubu rero, natinze kuvuga ndimo nibaza ukuntu byaba bibaye igitangaza kongera kwibona mu ishuri. Gusa kuko ririya ryigisha imyuga ritwegereye mureke dutahe twingingiye ababyeyi bacu babidufashemo.

Mutabazi: mureke ndebe uko ngurisha, ubwo nibikunda tuzahurira ejo kuri iryo shuri

Agakino ka kabiri

Aka gakino karakinirwa ku ishuri ry’imyuga, nyuma yo kwiwandikisha.

Kanyange: (yivugisha). Mbega ngo ndagira amahirwe iwacu bakanyohereza kwiga ubudozi! Eee, reka ndebe ko uriya ari Kamariza uhingutse! Mwaramutse Kamariza, nawe byakunze turigana kudoda?

Kamariza: umva, natashye mbikojeje iwacu barishima bampa ibikenewe none mpise nza. Ahubwo reka twinjire mu ishuri ndumva icyuma kivuze.

Murisa: (aseka). Mutaba, ya myumbati yakuvuyeho?

Mutabazi: Burya twamaze gutandukana mbona umuguzi, nahise ntaha mbwira iwacu ko nifuza kwiga ubwubatsi, bahise bambwira bati: “Nubimenya uzadusanire iki gikoni cyari kigiye kuzatugwa hejuru”! Wowe se harya ngo wahisemo gusudira?

Murisa: Umva ni ugusudira ngomba kwiga pe ni byo nifuza. Reka dusuhuze ba bakobwa ndabona bagiye kwinjira mu ishuri. Mbe Kanyange na Kamariza mwaramutse! Muraberewe mu myambaro y’ishuri pe!

Kamariza: (agaragaza ibyishimo). Mwaramutse neza ndabona umugambi twawushyigikiye pe! Biradushimishije twese! Burya twari twarayobye! Umuntu umuntu akwiye gukora umwuga yarabanje kuwiga, nibwo yawukora adahuzagurika kandi akarushaho kuwunoza. Ni byo koko burya Abanyarwanda baca umugani ngo: “Ubwenge burarahurwa”!

Ikinamico: Uturango tw’ikinamico

.....
.....

Umuwugo:

Akamaro k'umwuga

Reka nkurate mwuga wange
Reka nkurate mwuga mwiza
Reka nkurate ubwiza bwawe
Reka nkuratire abatakuzi
5. Reka ngushime uko bikwiye.

Kutakumenya si uguhirwa
Kutakumenya ni ugucikwa
Kutakuyoboka ni uguhezwa
Kutakugana ni uguhomba
10. Igihombo rwose ni icyo.

Igihe cyose mbyuka ngenda
Ntwaye ibitabo n'ibikoresho
Umunsi ukira mpabwa ubwenge
Na wa mubyeyi nkesha byinshi
15. Umurezi wange ushimwa rwose.

Akamaro kawe si ukubeshya
Ibyo wahaye abagusanze
Byarafatitse twarashimye
Ubukire utanga buraturanga
20. Mwuga wacu uri ndashyikirwa.

Ari abahanga bumva bwangu,
Abafite ubumuga n'ibindi byago
Iyo mu byaro n'imigi hose
Ntawakugannye wahombye
25. Itekiteka gahore uhanze!

Ibiranga umuvugo:

.....
.....

2. Ni izihe ngingo (insanganyamatsiko) mwasanze mu myandiko mumaze gusoma?
3. Subiza ibibazo bikurikira ku ihangamwandiko:
 - a. Ereka imiterere y'imibata y'umwandiko ntekerezo
 - b. Garagaza igikanka k'ihangamwandiko ntekezo

- c. Erekena intambwe zikurikizwa mu guhimba umwandiko ntekerezo
4. Itegereze interuro zikukikira utahure imikoreshereze y'inyuguti nkuru
- Ifuni ibagara ubucuti ni akarenge.
 - Twese duhagurukire kujijuka. **Wabigeraho** ute utazi gusoma? **Ntibishoboka**.
Ntoye isaro ryiza shenge weee! **Reka** nge kuryereka nyogokuru.
 - Mariya arasubiza ati: “**Ibyo** uvuze **bingirirweho**”.
Igihe Mariya yavugaga ati: “**bingirirweho**”, yari yaramaze gusabwa na Yozefu.
 - Ku wa **Gatanu**, ku wa **Gatandatu**.
Ugushyingo gushyira **Ukubozza**.
Mu Rwanda haba ibihe bine by'ingenzi: **Urugaryi**, **Itumba**, **Iki** (**Impeshyi**)
n'**Umuhindo**.
 - Rutayisire** atuye i **Huye** hafi ya **Cyarwa**.
Mu **Mutara** hera ibigori.
I **Washingtoni** (**Washington**) ni ho hari ikicaro cya Banki y'Isi.
Uwitwa Enshiteni (**Einstein**) yari umuhanga cyane.
 - Bwana **Muyobozi** w'**Akarere**,
Minisiteri y'**Ubuhanzi** n'**Ubworozi**
Umuryango w'**Abibumbye**
Koperative **Dufatanye**
 - Dogiteri Karimanzira**
Nyakubahwa Perezida wa Repubulika
Umurenge wa Nyarugenge
Abanyarwanda barimo **Abasinga** n'**Abagesera**
Dukwiye guteza imbere **Ikinyarwanda**.
Mu **Ntambara** ya **Kabiri** y'Isi **Yose** hapfuye abantu benshi.
Banki Nkuru y'Igihugu yakoze inoti nshya ya magana atanu.
 - Nujya mu mugi ungurire **Imvaho Nshya**.
Musenyeri Kagame Alegisi ni we wanditse **Indyoheshabirayi**.
 - GAHIRE** Rose
UMURISA Keza
BUTERA Simoni
Nagiye kwa **Gahire** Rose anyakira neza.
5. Itegereze interuro/amagambo bikukikira utahure amagambo afatana n'adafatana
- Umwihanduzacumu Rugwizangoga
 - Ndumva **nawe** umeze **nkange**.
Ndabona **natwe** tumeze **nkamwe**.
 - Umwana **wange**.
Amafaranga **yabo**.

- Ndumva **na we** ameze **nka bo**.
Ndabona **na ko** kameze **nka bwo**.
- d. Iwacu **ntawurwaye**.
Muri iri shuri **ntabatsinzwe**.
 - e. Wa mugabo **nimusangayo turagenderako** ntitugaruka.
Umuryango we wamuhaye umurongo **agenderaho**.
 - f. **Nimugende** mudasanga imodoka yabasize.
Nimugera muzamunsuhurize.
 - g. Aragera ino **nijoro**.
Yatashye **ejobundi**.
 - h. Imbeba yihishe **munsi** y'akabati.
 - i. Nujya **iburyo** ndajya **ibumoso**.
Mbwirira abari **ikambere** bazimanira abashyitsi.
Nimuza **iwacu** nzishima.
 - j. **Niko**, uraza?
 - k. Urahinga **nuko** uteza.
 - l. Perezida yavuze ijamba arangije amashyi ngo: **"kacikaci"**!
Babwire bage binjira **umwumwe**.
 - m. **Nyiricyubahiro** Musenyeri
Nyirubutungane Papa
6. Itegereze interuro zikukikira utahure ikata ry'inyajwi zisoza ibinyazina ngenera n'ibyungo "na" na "nka" n'inyajwi zisoza zidakatwa
- a. Wakomerekejwe **n'iki**?
Ntakibyara **nk'intare** n'ingwe.
Umubare **w'amashuri y'imyuga** uriyongera.
Nyereka uko batsa tereviziyo **n'uko** bayizimya.
Umwaka **w'ibihumbi bibiri** na cumi **n'ibiri**.
Umwaka **wa** 2012.
 - b. Kabya inzozi.
 - c. **Nyiri** ubwenge aruta **nyiri** uburyo.
Amasunzu **si** amasaka.
Icyatumye ejo ntaza iwawe **ni** uko natashye ndwaye.
 - d. **Nyiricyubahiro** Musenyeri.
 - e. **Nyirabukwe** aramukunda.
 - f. **Mu Mutara** higanje imisozi migufi.
Mu Kagera habamo ingona.
Amatungo yanyuze **mu murima**.
Kwita **ku nka** bigira akamaro.
Abana bavuye **ku iriba** bajya **mu** ishuri.
Banyuze **mu** ishyamba.
 - g. Amatungo yanyuze **mu murima**.
Kwita **ku nka** bigira akamaro
7. Itegereze amagambo/interuro utahure imikoreshereze y'amazina bwite.

- a. **A** Marangara n’i Gisaka ni tumwe mu turere twa kera tuvugwa mu mateka y’u Rwanda.
U Rwanda rurigenga.
U Mutara wera ibigori, ibitoki n’ibishyimbo.
U Bubirigi buri mu majyaruguru y’uburasirazuba bw’u Bufaransa.
- b. **UWASE Ikuzo Laurette**
VUBI Pierre
KARIMA Biraboneye
MUNEZERO Salima
- c. **Enshiteni (Einstein)**
Shumakeri (Schumacher)
Ferepo (Fraipont)
Cadi (Tchad)
Kameruni (Cameroun / Cameroon)
Wagadugu (Ouagadougou)
Ositaraliya (Australie / Australia)
- d. **KARERA John**
KEZA Jane
KAMARIZA Jeanne
RUTERANA Abdul
MFIZI Yohana
- e. **Intara y’Amangepfo**
 Umujyi wa Kigali
 Akarere ka Rulindo
 Akagari ka Cyimana
 Umurenge wa Cyeru
8. **Itegereze interuro zikurikira ugire icyo uzivugaho (uzigereranye) ukurikije ibice bizigize.**
 - a. Kamana arasya ibigori.
 - b. Yifuza yuko bakora.

3.1 Ingingo z’ingenzi zo kwitabwaho

- Kwandika hakurikijwe uturango twa buri mwandiko
 - **Umwandiko ntekerezo:** urangwa no kurambura ingingo (ibitekerezo) zawe witekerereje ariko zigendanye n’insanganyamatsiko yatanze. Insanganyamatsiko ishobora kuba interuro ivuga ku buzima busanzwe cyangwa ijyanye n’umwandiko wasomwe, umugani mugufi, imwe mu mvugo z’Ikinyarwanda n’ibindi.

- **Umwandiko mbarankuru:** urondora ibintu nk’aho byabayeho, ukarondora abo byabayeyeho kabone n’aho byaba ari ibihimbano. Uhera ku ntangiriro ukageza ku iherezo ry’ibivugwamo.
- **Umwandiko mvugamiterere/mvugo shusho:** ugaragaza ikivugwa uko kiri, ukagaragaza imiterere yacyo.
- **Ikinamico:** igira umutwe, umwinjizo, abanyarubuga, inyobozi, imvugano, inyishyu, umwivugisho, agakino, n’akabuga nkuru.
- **Ibiranga umuvugo:** Kuba: wanditse mu mikarago, usingiza ikintu runaka, buri mukarago utangijwe inyuguti nkuru, ururirimbo (gutondagurwa hubahirizwa inyana yawo), no kuba urimo uturango tw’ikeshamvugo (isubirajwi, isubirajambo, imizimizo...)
- Kubahiriza amabwiriza y’imyandikire y’Ikinyarwanda
- Interuro y’inyabumwe (shingiro) ni interuro igizwe n’ijambo rimwe cyangwa menshi kandi ikabamo inshinga imwe itondaguye
- Interuro y’urusobe (y’inyunge) ni interuro irimo inshinga zitondaguye zirenze imwe. Igice kimwe k’interuro y’urusobe kitwa inyangingo. Akenshi izo nyangingo ziba zunzwe n’ibyungo. Imwe iba ari inyangingo ngaragirwa (ifite igitekerezo cyuzuye), indi ikaba inyangingo ngaragira (ifite igitekerezo kituzuye gikeneye ikindi kugira ngo gisobanuke).



Igikorwa cy’ umwitozo wunganiwe



Ikigwa cya 3.1 Umwitozo 3

Ugendeye ku bumenyi n’ubushobozi wugukiye mu mwitozo wabanje, subiza ibibazo bikurikira.

1. Nimukorere mu matsinda mato mutandukany umwandiko mbarankuru n’umwandiko mvugamitere ushingiyeye ku turango twayo.
2. Garagaza ibigize imbata y’umwandiko n’intambwe zikurikizwa mu ihangamwandiko ntekerezo.
3. Kosora interuro zikurikira wubahiriza amabwiriza y’imyandikire y’Ikinyarwanda.
 - a. twese duhagurukire kujijuka wabigeraho. ute utazi gusoma? ntibishoboka.
 - b. ntoye isaro ryiza shenge weeee! reka nge kuryereka nyogokuru.



Igikorwa cy’ umukoro ngiro



Ikigwa cya 3.1 Umwitozo 4

Subiza ibibazo bikurikira:

1. Hanga umwandiko ntekerezo ku nsanganyamatsiko wihitiyemo, wubahiriza imbata yawo.
2. Tandukanya interuro y'inyabumwe n'interuro y'urusobe.
3. Kosora interuro zikurikira wubahiriza amabwiriza y'imyandikire y'Ikinyarwanda.
 - a. Nujya mu mugi ungurire imvaho nshya.
 - b. Musenyeri Kagame Alegisi ni we wanditse indyoheshabirayi.



Iby'ingenzi ngomba kwibuka:

- Uwandika agomba kwita ku turango tw'umwandiko yandika kandi akubahiriza amategeko (amabwiriza) y'imyandikire y'Ikinyarwanda.




Isuzuma rinoza imygire n'imygishirize

Uyu mwanya wagenewe ibibazo byo gusuzuma uko wumvise inyigisho irangiye.

1. Erekena intambwe zikurikizwa mu guhimba umwandiko ntekerezo
2. Hanga umwandiko ntekerezo ku nsanganyamatsiko wihitiyemo, wubahiriza imbata yawo.
3. Tandukanya interuro y'inyabumwe n'interuro y'urusobe, utange n'urugero kuri buri kicio k'interuro muri ibyo.
4. Kosora interuro zikurikira wubahiriza amategeko (amabwiriza) y'imyandikire y'Ikinyarwanda.
 - a Umwana wa nge.
 - b Ndumva nawe ameze nkabo.

Ikigwa cya 3.2: Itegura ry'inyandiko zinyuranye kandi zinoze zifitanye isano n'akazi yubahiriza amabwiriza y'imyandikire y'Ikinyarwanda n'imiterere y'inyandiko asabwa.



Ubushobozi fatizo: Gutegura ry'inyandiko zinyuranye kandi zinoze zifitanye isano n'akazi yubahiriza amabwiriza y'imyandikire y'Ikinyarwanda n'imiterere y'inyandiko asabwa.

Ubumenyi	Ubumenyi ngiro	Ubukeshya
1. Kuvuga amoko y'ibaruwa	1. Gutandukanya amoko y'ibaruwa	1. Gushishikarira kwandika ibaruwa yujuje ibisabwa
2. Kuvuga inshoza ya raporo y'inama	2. Kwandika raporo no kugaragaza imbata yayo	2. Guharanira kwandika raporo yujuje ibisabwa
3. Kuvuga inshoza Urutonde rw'ibikoresho (Devis)	3. Kwandika urutonde rw'ibikoresho (Devis) yubahiriza imbata yarwo	3. Guharanira kwandika urutonde rw'ibikoresho (Devis) mu bryo bukwiye
4. Kurondora amoko y'amatangazo	4. Gutandukanya amoko y'amatangazo	4. Gushishikarira gutanga amatangazo yujuje ibisabwa
5. Kuvuga inshoza y'ubutumwa bugufi	5. Kwandika ubutumwa bugufi	5. Guharanira kwandika ubutumwa bugufi akurikiza ibiburanga.

 **Intangiriro: Ni ibiki nzi kuri iyi nyigisho, hanyuma ni ibihe nkeneye kumenya?**



Ikigwa cya 3.2 Umwitozo 1

Ni ayahe moko y'inyandiko waba uzi akoreshwa mu gutanga ubutumwa bunyuranye?



Igikorwa cy' ugutahura ibisubizo by'ikibazo



Ikigwa cya 3.2 Umwitozo 2

1. Mumaze gusomera mu matsinda amabaruwa akurikira, mugaragaze ibiranga ibaruwa y'ubucuti/isanzwe n'ibaruwa y'butegets/ubuyobozi.

Ibaruwa y'ubucuti/isanzwe

BATAKARIZA Sheja Yvette
Mata 2019

Nyakarambi, ku wa 30

Kuri mukuru wange nkunda cyane,

Muraho neza!

Nejejwe no kukwandikira ngira ngo nkumenyeshe amakuru yange. Nagira ngo kandi nkubaze amakuru yo mu rugo kuko mbakumbuye cyane kubera ko maze igihe ku ishuri.

Ubu ku ishuri ndiga neza nta kibazo n'amasuzuma dukora ndayatsinda. Mwebwe se mu rugo mumeze mute? Barumuna bacu na musaza wacu muto baraho? Ubansuhurize uti:

“Mutahe cyane, arabakumbuye rwose”!, si we uzabona ibiruhuko bigera.”
Imana
ibarinde.

wawe

Yari murumuna

BATAKARIZA Sheja Yvette

Ibaruwa y'butegetsi/ubuyobozi

KEZA Uwimana Solange.....Gasabo, ku wa 02 Werurwe 2019

Ishuri rya GS Kacyiru II

Umurenge wa Kacyiru

Akarere ka Gasabo

Bwana Umuyobozi w'Akarere
ka Gasabo.

.....
.....
.....
.....
.....

Binyujijwe:

-
-
-

Bwana Umuyobozi w'Urwunge
rw'Amashuri rwa Kacyiru ya II

Impamvu: Gusaba guhindurirwa ikigo

Bwana Muyobozi,

Nejejwe no kubandikira ngira ngo mbasabe guhindurirwa ikigo, nkava ku Rwunge rw'Amashuri rwa Kacyiru nkajya ku Rwunge rw' Amashuri rwa Kimironko.

Mu by'ukuri, Bwana Muyobozi, muri ino minsi iwacu bimukiye ku Kimironko, nkaba ngumye ku Kacyiru ntabona aho niga ntaha. Nigaga mu mwaka wa Kabiri w'amashuri yisumbuye. Ku mugereka w'iyi baruwa murahasanga fotokopi y'indangamanota hamwe n'ikemezo cy'ubuyobozi bw'ishuri nigagaho.

Mu gihe ntegereje igisubizo cyanyu, Bwana Muyobozi, mbaye mbashimiye.

KEZA Uwimana Solange

Bimenyeshejwe:

- Madamu Umuyobozi Ushinzwe Uburezi mu Karere ka Gasabo
- Bwana Umuyobozi Ushinzwe Uburezi mu Murenge wa Kacyiru
- Bwana Umuyobozi w'Urwunge rw'Amashuri rwa Kacyiru ya II

Ibiranga ibaruwa isanzwe

Ibaruwa isanzwe igomba kugaragaza ibi bikurikira:

.....

Ibiranga ibaruwa y'ubutegetsi/ubuyobozi

Igira ibice bikurikira:

.....

2. Itegereze inama ikurikira na raporo yayikorewe maze utahure inshoza n'imbata bya raporo y'inama.

Inyandiko mvugo y'inama y'Ishuri ry'Imyuga rya Ikerekezo yo ku wa 18 Kamena, 2019

Iyi nama yahuje Umuyobozi w'Ishuri ry'Imyuga rya Ikerekezo, ababyeyi barerera muri iryo shuri, abarezi baryigishamo, abaterankunga baryo ndetse n'abanyeshuri baryigamo.

Ibyari ku murongo w'ibygwa:

- a. Kwakirana no gutanga ikaze
- b. Imyitwarire y'abanyeshuri
- c. Kwitabira amasomo ku gihe no kugira isuku
- d. Ibindi: gufata neza imfashanyigisho

Umuyobozi w'ishuri yatangiye inama yakira abayitabiriye bose ndetse aha ikaze abo banyeshuri bose bari bahari. Yakurikijeho ingingo ijyanye n'imyitwarire y'abanyeshuri. Yakomereje ku ngingo yo kubasaba kwitabira amasomo yabo kandi bakinjira mu ishuri kare bagasubiramo amasomo yabo mbere y'uko abarimu baza kubagezaho inyigisho z'umunsi. Yongeye kubasaba kwitabira ishuri kandi bakarangwa n'isuku aho bari hose.

Ku ngingo isoza, umuyobozi yibukije abanyeshuri gufata neza imfashanyigisho baba bahawe zirimo ibitabo, imashini bigiraho kudoda ndetse n'ibikoresho byo gusudira. Ababyeyi bibukijwe ko bagomba kurushaho kuba hafi y'abana babo babaha ibyo bakeneye mu myigire yabo. Abaterankunga bo biyemeje kurushaho kongera inkunga batera iryo shuri kuko rizicunga neza.

Umuyobozi w'ishuri yasoje inama ashimira abayitabiriye bose, anabakangurira kwita ku byo baganiriyeho.

Umwanditsi w'inama: Mukazikwiye Higiye Innocente (umurezi uhagarariye abandi)

Umuyobozi w'inama: KANYESHYAMBA Mujyanama Simon (Umuyobozi w'Ishuri ry'Imyuga rya Ikerekezo).

Raporo y'inama y'inama y'Ishuri ry'Imyuga rya Ikerekezo yo ku wa 18 Kamena, 2019

KANYESHYAMBA Mujyanama Simon,
Kamena, 2019

Kimana, ku wa 18

Umuyobozi w'Ishuri ry'Imyuga rya Ikerekezo
Umurenge wa Kimana
Akarere ka Byiza

Iyi nama yahuje Umuyobozi w'Ishuri ry'Imyuga rya Ikerekezo, ababyeyi barerera muri iryo shuri, abarezi baryigishamo, abaterankunga baryo ndetse n'abanyeshuri baryigamo.

Ingingo zaganiriweho:

- a. Kwakirana no gutanga ikaze
- b. Imyitwarire y'abanyeshuri
- c. Kwitabira amasomo ku gihe no kugira isuku
- d. Ibindi: gufata neza imfashanyigisho

Ibyavuzwe ku ingingo zaganiriweho: abanyeshuri bibukijwe ko bakwiye kugira imyitwarire ikwiye, kwitabira amasomo badakererwa kwinjira mu ishuri kandi bagaragaza isuku aho bari hose, cyanecyane ku myambaro yabo y'ishuri. Bashishikarijwe gufata neza ibikoresho bigiramo n'ibyo bifashisha mu kwimenyereza umwuga bakurikiye nk'imashini zidoda, ibikoresho bakoresha basudira n'ibindi.

Ingamba zafashwe:

Abanyeshuri bagomba kurangwa n'imyitwarire myiza, kwita ku masomo, kugira isuku no gufata neza ibikoresho by'ishuri.

Ababyeyi bagomba kurushaho kuba hafi y'abana babo babaha ibyo bakeneye mu myigire yabo.

Abaterankunga biyemeje kurushaho kongera inkunga batara iryo shuri kuko rizicunga neza.

Ibyifuzo:

- Turifuza ko abanyeshuri akarere kabafasha kubona aho bakorera imenyerezwamwuga igihe barimo basoma amasomo yabo kuko bo ku giti cyabo bibagora.
- Turifuza kandi ko abanyeshuri ubuyobozi bw'akarere bwabakorera ubuvugizi ku isoko ry'umurimo kugira ngo bazabone aho bagaragariza ubumenyi n'ubushobozi bahawe.

**KANYESHYAMBA Mujyanama Simon,
Umuyobozi w'Ishuri ry'Imyuga rya Ikerekezo**

Inshoza ya raporo

Raporo ni.....

Imbata ya raporo

Raporo igira imbata igizwe na

3. Mu matsinda mato, nimwitegereze urutonde rw'ibikoresho rukurikira, mutahure inshoza yarwo n'ibice birugize.

Urutonde rw'ibikoresho umunyeshuri ugiye gutangira ishuri ry'ubudozi akeneye:

Inimero	Ibikoresho	Ingano y'ibikenewe	Agaciro ka kimwe mu mafaranga (frws)	Agaciro ka byose
1	Imyambaro y'ishuri	Imiguro 2	6000frws	12000frws
2	Inkweto	Imiguro 2	4000frws	8000frws
3	Amavuta yo kwisiga	Amacupa 2	2000frws	4000frws
4	Isabuni	Imiti 2	500frws	1000frws
5	Amakayi ya registre	3	1200frws	3600frws
6	Amakaramu	6	120frws	720frws
7	Ubudodo	3	100frws	300frws
8	Igitambaro cyo kwitorezaho	Metero 2	1000frws	2000frws
9	Metero bushumi	1	300frws	300frws
10	Ubudodo	3	100frws	300frws
11	Utundi dukoresho yakenera bitunguranye			3220frws
Igiteranyo				35440frws

Inshoza:

Ibice bigize urutonde rw'ibikoresho:

4. Nimukorere mu matsinda mwigereze amatangazo akurikira hanyuma mugaragaze itandukaniro hagati yayo.

Kanyenkore araranga ibyangombwa byatoraguwe birimo indangamuntu n'ikarita y'itora byanditseho NYIRARUMAGA . Uwakumva ari ibye yahamagara kuri terefoni ifite numero zikurikira: 0788...

Bukeshya ararangisha ibyangombwa bye byabuze birimo ikarita yo kwivurizaho n'uruhushya rwo gutwara ibinyabiziga . Uwabibona yahamagara kuri terefoni ifite numero : 0788... akazahembwa bishimishije.

Umunyamabanga nshingwabikorwa w'akagari k'Amahoro aramenyesha abantu bese ko umuganda utaha uzakorerwa mu ngo mu bikorwa by'suku n'isukura.

Amatangazo yo kumenyesha

.....

Amatangazo yo kuranga

Amatangazo arangisha:

5. Itegereze ubutumwa bugufi bukurikira werekane itandukaniro hagati yabwo n'ibaruwa ukurikije uko twayibonye

Uze duhurire ku ishuri, tuvugane kuri ya gahunda.

Ibaruwa

mu gihe ubutumwa

3.2 Ingingo z'ingenzi zo kwitabwaho

- Muri rusange hari ibaruwa isanzwe (y'ubucuti) yandikirwa umuntu usanzwe (nk'inshuti, umubyeyi, umuvandimwe...) n'ibaruwa y'ubuyobozi (y'ubutegetsu) yandikirwa urwego rw'ubuyobozi uru n'uru cyangwa se ikandikwa n'urwego rw'ubuyobozi rwandikira umuntu runaka.
- Raporo yandikwa kugira ngo igaragarize umuyobozi w'urwego rukurikiraho ibyakozwe. Ikaba igaragaramo intangiriro, igihimba n'umusozo.
- Ibice bigize urutonde rw'ibikoreshe: **inimero, ibikoreshe, ingano y'ibikenewe, agaciro ka kimwe mu mafaranga, agaciro ka byose n'igiteranyo.**
- Habaho amoko y'amatangazo anyuranye. Ingero: amatangazo amenyesha, aranga arangisha n'ayandi.
- Ibaruwa yandikwa ku rupapuro, kuri "internet" n'ahandi mu gihe ubutumwa bugufi bunyura kuri terefoni.



Igikorwa cy' umwitozo wunganiwe



Ikigwa cya 3.2 Umwitozo 3

Subiza ibibazo bikurikira:

1. Andikira inshuti yawe ibaruwa isanzwe umubwira ko uzamusura mu iruhuko. Uyandike wubahiriza imbata y'ibaruwa isanzwe.
2. Mukorere mu matsinda mugaragaze ibice bigize raporo.
3. Andika itangazo ryo kumenyesha wishakiye wubahiriza ibisabwa.



Igikorwa cy' umukoro ngiro



Ikigwa cya 3.2 Umwitozo 4

Subiza ibibazo bikurikira:

1. Andikira umuyobozi w'ikigo k'ishuri wigaho ibaruwa y'ubuyobozi umusaba uruhushya rwo kutazitabira amasomo ku munsu ukurikiyeho kubera impamvu runaka. Uyandike wubahiriza imbata y'ibaruwa y'ubuyobozi.
2. Garagaza ibice bigize imbata ya raporo n'ibivugwamo mu matsinda.
3. Andika urutonde rw'ibikoresho ku gikorwa runaka witekerereje wigana urugero rwatanzwe mu mwitozo wabanje.
4. Andika itangazo ryo kuranga wishakiye wubahiriza ibisabwa.
5. Andika ubutumwa bugufi umwe mu banyeshuri mwigana wubahiriza imbata y'ubutumwa bugufi.



Iby'ingenzi ngomba kwibuka:

- Inyandiko zose zigomba kubahiriza amabwiriza y'imyandikire.
- Ujya gukora igikorwa runaka agomba kubanza gukora urutonde rw'ibikoresho.



Isuzuma rinoza imyigire n'imyigishirize

Uyu mwanya wagenewe ibibazo byo gusuzuma uko wumvise inyigisho irangiye.

1. Ni irihe tandukaniro hagati y'ibaruwa y'ubucuti n'ibaruwa y'ubuyobozi?

2. Andika itangazo ryo kurangisha wishakiye wubahiriza ibisabwa.
3. Andika raporo y'inama runaka wubahiriza imbata yayo.
4. Andika ubutumwa bugufi umwe mu bo mubana cyangwa umuturanyi wubahiriza imbata y'ubutumwa bugufi.

1. Uzuza imbonerahamwe ikurikira.

Nkuko byavuzwe ku ntangiriro yiyi mbumbe, nta buryo buri bwo cyangwa ubutari bwo bwo gusubiza iki kibazo; ahubwo ni ibigufasha wowe ubwawe muri iyi nyigisho. Tekereza wowe ubwawe. Niba nyuma yo kwiga iyi mbumbe irangiye, ibi noneho washoboye kubikora n'ikigero ubishoboyeho. Soma ibibanza mu kazu ko hejuru hanyuma ushyire akamenyetso aho ubona hajyanye n'ikigero cy'uko ubyumva.

Inararibonye ryange	Nta kintu na kimwe nzi ku mikoreshereze yabyo.	Nziho bike.	Nziho ibiringaniye.	Nziho byinshi.	Ndiyizeye ku mikoreshereze yabyo.
Ubumenyi, ubumenyi ngiro n'ubukesha					
Guhimba no kwandika imyandiko mu buryo bunoze ku nsanganyamatsiko zitandukanye yubahiriza amategeko y'imyandikire, imyubakire y'interuro n'imiterere iboneye y'imyandiko.					
Gutegura inyandiko zinyuranye kandi zinoze zifitanye isano n'akazi yubahiriza amabwiriza y'imyandikire y'ikinyarwanda n'imiterere y'inyandiko asabwa					

2. Uzuza iyi mbonerahamwe kandi wibuke kwereka umutoza ibyo wujemo.

Ibyakozwe neza	Ibikeneye kongerwamo imbaraga	Ibikorwa byakwifashishwa mu kongera imbaraga aho bikenewe
1.	1.	1.
2.	2.	2.

IBITABO, INYANDIKO N'IMBUGA NKORANYAMBAGA BYIFASHISHIJE

a. IBITABO

BAKAME Editions (2013), *Ikinyarwanda Ikibonezamvugo mu mashuri abanza n'ayisumubuye*. 2nd edition, Kigali.

BIZIMANA, S. n'abandi (2000), Imiteere y'Ikinyarwanda IRST Butare, *Igitabo cya I WDA, CCMKN201, Ikinyarwanda gikwiye*, (2017)

IKIGÔ CY'ÛBUSHAAKASHAATSI MU BY'ÛBUHAÂNGA N'ÛKÔRANABÛHAÂNGA (n.d), *Inkoranya y'Ikinyarwanda mu Kinyarwanda*, IRST Butare, Igitabo cya 1

IKIGO K'IGIHUGU GISHINZWE INTEGANYANYIGISHO NCDC (2008), *Imyandiko mfashanyigisho, Umwaka wa gatandatu w'amashuri yisumbuye*.

INTEKO NYARWANDA Y'URURIMI N'UMUCO (2014). *Amabwiriza ya Minisitiri no 001/2014 yo ku wa 08/10/2014 agenga imyandikire yemewe y'Ikinyarwanda*, Kigali.

JACOB I. (1985). *Dictionnaire Rwandais-Français* en 3 volumes, Tome troisième, I.N.R.S, Butare.

JACOB I. (1930). *Dictionnaire Rwandais-Français* en 3 volumes, Tome premier, Kigali.

MINISTRY OF EDUCATION-RWANDA EDUCATION BOARD (2015). *Teacher Training Manual Phase I*, Kigali.

MINISTRY OF EDUCATION-RWANDA EDUCATION BOARD (2016), *Teacher Training Manual Phase II*, Kigali.

RWANDA EDUCATION BOARD (2015). *Integanyanyigisho y'Ikinyarwanda mu mashuri ikinyarwanda kigishwamo nk'isomo bihitiyemo*, Kigali.

b. INYANDIKO

Minisitiri ya Siporo n'Umuco (2014), AMABWIRIZA YA MINISITIRI N° 001/2014 YO KU WA 08/10/2014 AGENGA IMYANDIKIRE Y'IKINYARWANDA
UNICEF (1996). *Dukunde amahoro*, UNESCO.

MURERA Jean Marie Vianney (2007), *Imyigishirize y'iyigantêruru ry'Ikinyarwanda mu mashuri yisumbuye, amashuri y'indimi*, Umurimo w'ubushakashatsi, UNR, BUTARE

c. IMBUGA NKORANYAMBAGA

<https://www.teachrwa.org> >, res...Resources – TEACH Rwanda
<https://www.lexutor.ca> > rwa..., publishing textbooks & teacher's guide for Rwanda's competency...

<https://www.lexutor.ca> > rwa

www.reb.rw in house

www.regov.rw/new curriculum



This publication is made possible by the support of the American People through the United States Agency for International Development (USAID). The contents of this are the sole responsibility of Education Development Center (EDC) and do not necessarily reflect the views of USAID or the United States Government.

RWANDA POLYTECHNIC – RP



P. O. BOX 164 Kigali Rwanda



info@RP.gov.rw



www.RP.gov.rw